


# *KUWA, KUNDIMA, KUSALA NA NZILA YA NDIINGA YA NZAMBI*

 Ntangu yayi, ba-bande yayi, yina kele ya lukutakanu yayi na suka yayi, kele ya kuteka ve, ya kele kaka samu na Dibuundu to samu na muntu, samu ti ya kele na zulu ya Malongi. Mpe na balukutakanu na ngaanda kuna, ya ke nataka mubulu, samu ti ya kele mpsi na kutala bantu zole kumona na mutindu disu mosi na mutindu ya kulunga, kasi beto fwana vwanda ntima na ntima, na mutindu nyonso. Kasi ya kele, beto na tabernacle awa, ba-bande yayi kele, beno ke tala na . . . Ya kele kaka samu na bankundi, mpe nionso yina.

<sup>2</sup> Ntangu yayi beto kulumusa bayintu ya beto na mwa ntangu fioti samu na kisambu. Bantu yikwa ke zola ti ba bambuka beno moyo na ntangu beno me kulumusa bayintu ya beno? Kaka na diboko ya kutelemisa, na kutubaka, “Mfumumu, mu ke—mu ke na nsatu bubu yayi, mpe mu ke na nsatu ya lemvo ya Nge,” nionso yina ya kele.

<sup>3</sup> Tata ya beto ya Mazulu, beto me belama ntangu yayi na Kiti ya Nge ya kimfumumu ya kyadi, samu ti ba me lomba beto na kusala yayi. Mpe ba me tuba na beto na nzila ya Mwana na Nge, mpe Mvulusi ya beto, ti kana beto lenda lomba Nge konso kima yina na Nkumbu ya Yandi, yawu ke pesama. Na yina, Mfumumu, na kuzabaka ti beto ke na kuzinga na bivudi ya Nkwizulu ya Yandi, mpe ntangu yayi ya kutelama na bivudi ya kyadi ya Yandi, na yina beto ke lomba, Mfumumu, ti Nge ke soola, na nzila ya Mpeve-Santu, mambu yina beto ke lomba. Mpe beto ke kuwa na suka yayi, ti ya ke vwanda ve ya kuswaswana na Ndinga ya Nge to na ludedomo ya Nge ya nene, mpe mawa mpe lemvo ya Nge, ti kana beto lendaka lomba ti beto lendaka kuzwa lusakumunu ya luswaswanu bubu yayi na Mpeve-Santu. Ti Yandi kwisa na kati ya beto mpe ke swasikisa mabanza ya bantima ya beto, ke talisa na beto bisika ya kulemba ya beto, mpe ke belusa bimbevo ya beto, mpe ke kanga bantima ya beto, mpe ke vulusa bayina me zimbana, mpe ke kubika bantu samu na Nkwizulu ya Yandi. Mfumumu, widikila kisambu yayi.

<sup>4</sup> Ntangu yayi beto ke tanga Ndinga ya Nge. Mpe—mpe beto ke sambila, Mfumumu, ti na dilongi ya lukolo ya Lumingu na suka yayi, ti Nge ke basisa dibanza ya kutanga mpe ke lakisa Yawu na bantima ya beto. Samu, beto me kwisa awa samu na lukanu mosi. Lukanu yina, kaka, kele kuzaba Nge kulutila mbote. Beto yina kele Baklisto, na nzila ya Lukwikilu, beto zola zaba Nge kulutila mbote. Bayina me kuma ntete ve Baklisto, bawu zola

zaba Nge mutindu Mvulusi ya bawu. Bayina kele bambevo, zola zaba Nge mutindu Munganga ya bawu. Mpe beto ke sambila ti ya ke vwanda ve na muntu yina ke bika kivinga yayi, mpamba, kasi ti konso lombilu lendaka salama na mutindu ya kulunga, mpe nsatu nionso ke kuzwa mvutu, mpe muntu nionso—nionso ke vwanda na kiese, mpe ke basika na kivinga, na kutubaka, mutindu bayina vwandaka katuka na Emmaüs, “Bantima ya beto vwandaka pela ve na kati ya beto, mutindu Yandi vwandaka tuba na beto na nzila?” Samu beto ke lomba yayi na Nkumbu ya Yesu. Amen.

<sup>5</sup> Ntangu yayi samu na beno yina zola kubaka na Buku ya beno. Bambala mingi, mu me kuzwa yawu, ti na balukutakanu ya kumwangisa nsangu, ti kaka pene ya baminuti makumi zole to makumi tatu ke salaka mambu ya kulutila nene samu na nsangu ya kimpeve ya kulunga, mpe na manima lubokilu na autel. Kasi yayi kele lukolo ya Lumingi, mu zola ve kusala yawu mutindu yina na suka yayi. Mu ke na kuwa ya kutwadisa na kubaka ntangu ya munu mpe kuzonzila na zulu ya Ndinga.

<sup>6</sup> Ntangu yayi, kana muntu mosi kele na mpasi, na madidi mingi, kima mosi kaka beno fwana sala kele. . . Mpangi ya munu ya bakala, mukengi, kele na manima ya yinzo-Nzambi kuna, beno telemisa kaka diboko ya beno mutindu *yayi* na manima kuna, na yandi, mpe yandi ke yidika ndungutila. Mpe beto zola ti beno vwanda mbote mpe beno kuwa mbote mingi. Mpe beno kuwa Ndinga, samu ti beto ke na kivuvu na Mpeve-Santu samu na kulonga beto Ndinga ya Nzambi. Mpe beno nionso lenda kuwa mbote, kuna na manima? Kana beno lenda, beno telemisa maboko ya beno, kana beno—beno lenda kuwa mbote. Yina ke mbote.

<sup>7</sup> Ntangu yayi mu zola ti beno baka na munu, mu ke na mwa masonuku ya kusonika awa, mpe mwa Masonuku. Na yina mu zola ti beno kubaka na munu, ntete, na Buku ya ba-Romain, ba-Romain, kapu 9. Mpe beto zola kutanga samu na dilongi ya Masonuku, ntete, na ba-Romain 9:11.

*(Samu bana yina butukaka ntete ve, to vwandaka me sala ntete ve diambu ya mbote to ya yimbi, Nzammbi salaka mutindu yina samu ti luzolo ya yandi salama, nsodolo ya yandi kele ve samu na bisalu ya bawu, kasi na lubokilu ya yandi;)*

*Kasi ba tubaka na Lebeke, Mwana ya nge ya kuluntu ke vwanda kisadi ya leki ya yandi.*

*Mutindu ba me sonikaka, Mu me zola Yakobi, mpe mu me yina Esawu.*

<sup>8</sup> Bika ti Nzambi kubwela balusakumunu ya Yandi na ntangulu ya Masonuku yayi. Mpe ntangu yayi samu na dilongi mosi, samu na kukotisa dilongi ya munu, mu zola baka yayi mutindu yintu ya dilongi: *Kuwa, Kundima, Kusala Na Nzila Ya*

*Ndinga Ya Nzambi.* Bika ti mu vutukila yawu dyaka. “Kuwa, mpe kundima, mpe kusala na nzila ya Ndinga ya Nzambi.”

<sup>9</sup> Ntangu yayi, beto me zabana mingi, beto bantu yina ke talaka Masonuku kilumbu mpe mpimpa, mpe ke tangaka bazulunale ya beto mpe ke kuwaka milabu ya bazulunale, ti yinza yayi kele ya kutelama na maboko ya bangolo nene ya kimpeve. Mpe bawu zole kele bangolo ya nsambululu. Mpe mu ke kwikila ti bangolo yayi ya nene ke na kukwisa na yintu ya bawu. Mpe bangolo yayi zole ya nene vwandaka ya kufwanana na bana zole yayi ya Isaac. Wapi mutindu Nzambi, na ndwenga ya Yandi ya seko, me tuba bima nyonso na beto; ti beto lenda na nzila ya bima yayi kuzaba, yayi, yina kele na ntwala ya beto. Ya salaka yawu pwelele, ti Nzambi mpe Ndinga ya Yandi, mpe ntoto mpe yinza ya Yandi, kele ya kuyidika na mutindu ya kulunga kintwadi, ti ata mpe nsumuki lendaka mona ti kima mosi ke zola salama. Nzambi me yidika yawu mbote-mbote. Ata muntu mosi ve kele na esikize.

<sup>10</sup> Ntangu yayi, beto ke mona na bana-babakala zole yayi ntangu bawu, ntete bawu butuka, bawu vwandaka na mvita mosi na yankaka. Ata mpe mama ya bawu ya mwense. . . Samu ti, yandi vwandaka mwense, Rébecca ya kitoko yina me kwela nkuna ya mbote ya nsilulu ya Nzambi, Isaac; ti bawu zole vwandaka ya kubieka, bakwikidi ya kufulukana na Mpeve na Nzambi, yina ba kubikaka na ntwala samu na makwela yina ba vukanaka kintwadi. Nzambi zabaka yawu na ntwala. Mpe wapi mutindu kima mutindu yayi lendaka kwisa na nzila ya mama mosi yina, na nzila ya tata mosi? Mosi, muntu ya yimbi mingi; mpe yankaka, kieleka muntu ya mbote mingi; mpe wapi mutindu ti muntu ya mbote vwandaka monana muntu ya yimbi, mpe muntu ya yimbi ke monana muntu ya mbote.

<sup>11</sup> Ntangu yayi ya kele, ya ke vwandaka ntangu nionso, ya ke vwanda ntangu nionso manaka ya Nzambi. Nzambi lenda soba ve manaka ya Yandi. Samu, Yandi ke salaka manaka ya Yandi ya kulunga, samu ya kele kitini ya Yandi.

<sup>12</sup> Na disamba ya Eden, disumu vwandaka kitoko mingi tii ya bendaka Eve na kieleka, na disumu. Mpe na kati ya disamba yina mosi kisika ya vwandaka na yinti ya Luzingu, ya vwandaka mpe na yinti ya lufwa.

<sup>13</sup> Beto ke zaba yawu bubu yayi mutindu musiku ya kuswaswana. Ti, kisika ya kele na mbote, ya kele na yimbi; kisika kieleka kele, ya kele na luvunu. Mpe beto ke vwanda na lenda ata fioti ve, ata ti yina nziunga ya beto lendaka vwanda, ata fioti ve na lenda ya kukiningisa beto mosi na mvwandulu mosi na yankaka. Samu ti, Paul tubaka, “Ntangu mu ke zola kusala mbote, na yina yimbi kele awa.” Nsumuki ke vwanda ata fioti ve na lenda ya kuyambula Muklisto, Muklisto na nsumuki. Ya ke vwanda na mhangi mosi kuna, mpe kimbangi ya yimbi,

ntangu nyonso. Mpe beno ke sala nsodolo ya beno. Beno fwana baka lweka mosi to yankaka.

<sup>14</sup> Kasi na bana zole yayi ya babakala, ya kele ngitukulu na kuzaba yawu, ntete bawu butuka, bawu zole na nkuna mosi, na Isaac, yina vwandaka nsilulu. Ntangu yayi, leso ya beto kele yinda mingi, mpe mu ke zola vwanda na lufulu mingi tii beno lenda mona kieleka yina mu ke tubila. Mpe mwana ya ntete, Ésaü, yina kubutamaka; beto ke mona ti bawu vwandaka swana kaka ve mpe vwandaka nwana na kati ya kivumu ya mama ya bawu, kasi bawu basikaka na yandi, vwandaka nwana, Ésaü basikaka, mpe Jacob vwandaka ya kusimba yandi na kinkoso. Mpe bawu ke na kunwana dyaka.

<sup>15</sup> Mpe wapi mutindu ti, wapi mutindu ya lendaka katuka na tata to mama yina, ya kulunga, ya kuvedila, ya kusolama, ya santu! Na yina samu na kutelemisa yawu, ti, Nzambi ke bokilaka na nzila ya nsodolo. Ya fwana vwanda. Ata wapi mutindu mbote tata mpe mama ya beno vwandaka, wapi mutindu bawu vwandaka mbote, wapi mutindu Baklisto tata mpe mama ya beno vwandaka, ya ke tala kaka beno na kuvwandaka muntu, na ntelamanu ya beno na ntuala ya Nzambi. Leso yayi ke longa yawu, ti bawu, bana nyonso zole, ya vwandaka mpe na nzila ya nsodolo mpe lubokilu ya Nzambi, tata mpe mama, kento ya mwense mpe bakala ya santu, yina na nsuka kwisaka samu na kuvwanda ya kufwanana na nkuna ya yandi kwisaka Yesu Klisto. Yandi butukaka mutindu mosi na kati ya bantu ya kufwa. Yandi mekamaka, tata ya yandi na ntuala ya yandi. Mpe ba silaka yandi, na nzila ya nkuna yayi ya Isaac, ti yinza ya muvimba ke kuzwa mpulusu. Mpe na nzila ya bakala ya mutindu yina, mpe menga ya yandi vwandaka ya kuvedila mingi ti Nzambi lendaka bika ve ba-Philistin kusimba mama ya yandi, na manima Abraham me pesa yandi na yandi. Nzambi kwamisaka yinzo ya yandi, mpe tubaka, “Nge kele kaka mutindu muntu ya kufwa,” na kukebaka menga yina ya kuvedila. Mpe Rébecca, muntu ya kusungama, ya santu, yina Nzambi me fidisa mpe mama yina Nzambi me bokila. Mpe kubanda na nkuna yina ya santu basikaka kimpumbulu mpe mukwikidi. Beno me mona? Na yina ya me vwanda kati-kati ya lubokilu ya Nzambi, na nsodolo ya Nzambi.

<sup>16</sup> “Mpe ntete mosi to yankaka kubutuka, Nzambi tubaka, ‘Mu zola Jacob mpe me yina Ésaü,’ ntete mosi to yankaka kubutuka.” Na yina wapi mutindu beto fwana kuwa. Muntu yina me kuzwa Nzambi kuzonza na beno mpe kubokila beno na kukwiza na mesa ya Yandi mpe na Yinzo ya Yandi, mpe kuvwanda mwana ya Yandi ya bakala to ya kento, ya kele na kima ve ya nene mutindu yina.

<sup>17</sup> Bana-babakala zole yayi, kana beto ke tala nkadulu ya bawu, mosi ya bawu vwandaka muntu ya kimpeve, yina vwandaka Jacob. Mpe muntu ya nsuni vwandaka Ésaü. Kasi

bawu zole vwandaka misambidi. Mpe kima mutindu mosi me salama na kati ya bansungi, nsuni na kimpeve.

<sup>18</sup> Esau talisaka muntu ya ntoto, ya kimuntu, musambidi ya kutengama, kasi ya vwandaka na lenda mosi ve. Yawu vwandaka ve na kati ya yandi na kusala yawu. Yandi zolaka sala yawu ve. Ata mbala mosi ve ti Yandi vwandaka na lenda ya kununga bima ya yinza, kima ya nsuni.

<sup>19</sup> Kasi, Jacob, ya vwandaka kaka kukondwa mpasi samu na yandi na kusala yawu. Ntangu yayi, Jacob, lukanu mosi yina Jacob kuzwaka, mpe yina vwandaka samu na bukuluntu yango, ata mutindu yina yandi kuzwaka yawu, kasi kaka yandi kuzwaka yawu.

<sup>20</sup> Mpe mpeve ya lubutuku yina mosi me talisama na yinza bubu yayi, mpe ya ke mata na yintu ntangu yayi: mukwikidi ya kimpeve; mpe muntu ya nsuni, mukwikidi ya nsuni. Muntu mosi ve lenda tuba ti bawu zole vwandaka ve misambidi. Bawu vwandaka. Bawu tubaka ve ti mosi vwandaka sadila “biteki” mpe yankaka yina “Nzambi.” Bawu zole vwandaka bisadi ya Nzambi.

<sup>21</sup> Ntangu yayi, beno sala keba na Masonuku ntangu yayi na zulu ya dilongi yayi, samu ti kieleka ya ke sadisa beno. Beno me mona? Ntangu yayi, “Muntu nyonso ve yina me tuba, ‘Mfumu, Mfumu’ ke kota, kasi yina ke sala luzolo ya Tata ya Munu yina kele na Mazulu.”

<sup>22</sup> Ntangu yayi kana beno tala, Jacob vwandaka na kima yina yandi zolaka, samu, landila Ndinga, balusakumunu mpe kima ya mbote vwandaka na kati ya bukuluntu. Mpe, Jacob, yina vwandaka lukanu ya yandi mosi kaka, kima kaka mosi yina vwandaka na mabanza ya yandi vwandaka “kuzwa bukuluntu yina.” Mpe Esau monaka vwenzaka yawu. Muntu yina kuzwaka yawu, yandi vwenzaka yawu, to yandi vwandaka na nsoni ya yawu. Kasi Jacob vwandaka zola yawu kukondwa kutala mutindu yandi kuzwaka yawu, yandi vwandaka zola yawu.

<sup>23</sup> Ya kele mutindu na mukwikidi ya kimpeve bubu yayi. Yandi ke kipe ve wapi mutindu beno ke seka yandi, wapi mutindu beno ke mona yandi mpamba, wapi mutindu yandi fwana sala mambu ya buzoba samu na dibanza ya nsuni. Lukanu ya yandi kaka kele bukuluntu. Yandi zola kukuma na Nzambi, samu ti ya kele ya kubutama na kati ya yandi. Yandi lenda ve kukanga ntima na yawu.

<sup>24</sup> *Jacob* zola kutuba “muntu yina ke bakaka kisika ya muntu yankaka” to “muntu ya luvunu.” Kasi na manima ya kumona mpe kukota na muswa ya bukuluntu, yandi sobaka. Yina kele nsobolo, ya nsuni. Ba bokilaka yandi na ntangu yina, Jacob, “ntinu na Mfumu,” yina nwanaka na Yandi.

<sup>25</sup> Mukwikidi ya nsuni bubu yayi, “Oh, ntangu nyonso mu ke kwendaka na yinzo-Nzambi mpe ke salaka yina kele mbote,

wapi luswaswanu ya ke sala?” Yina kele nkonga ya Ésaü. Ba ke na kuseka Yandi dyaka mpe ke na kuvwenzaka bukuluntu, Yandi ke kipe yawu ve. Kasi Jacob zolaka yawu.

<sup>26</sup> Mpe bakala ya kimpeve bubu yayi, mpe kento ya kimpeve, yina kele ya kusolama, bayina zabaka ntete Nzambi na kwiza na Luzingu ya Kukonda nsuka, kana bawu fwana teka nyonso yina ba ke na yawu, kana ba fwana kukatula nkumbu ya bawu na buku nyonso na yinsi, bawu zola dyaka bukuluntu yina. Ya kele kima kaka yina kele mpasi samu na bawu, “kaka kuzwa muswa ya bukuluntu yina,” kaka yina. Ata mutindu yina, wapi mutindu bawu fwana landila, kana bawu fwana kufukama na autel mpe kudila, boo-hoo, kana ba fwana kota bisika yina mpe kuvutuka mpe kusungika bima, mpe ke teka yina ba kele na yawu, to—to kupesa nionso yina bawu kele na yawu mpe ke kuma kizieti mpe nzenza, yawu ke diambu ve. Bawu zola bukuluntu. Kaka yina bawu ke sepela na yawu, bukuluntu. Ntangu yayi, beno nganina bantu yayi ve. Ba lenda kanga ntima na yawu ve. Ba zabaka bawu na ntwala samu na yawu, ba soolaka bawu samu na yawu.

<sup>27</sup> Mpe na yina beto ke mona ti zole yayi, bantu ya nsuni mpe ya kimpeve, ya kele mutindu mosi kaka ya ke salamaka ntangu nyonso. Ya kele mutindu yina ya kele bubu yayi. Ya ke vwandaka ntangu nyonso mutindu yina.

<sup>28</sup> Cain na Abel. Na disamba ya Eden, ntangu ba vangaka Eden, ya vwandaka na bayinti zole samu muntu kusala nsodolo ya yandi. Mosi, yandi ke kuma na ndwenga; yankaka, yandi ke kuma Luzingu. Ya vwandaka na bana zole ya babakala, Cain na Abel, bawu zole vwandaka misambidi. Mosi ya bawu vwandaka na nsatu ya Luzingu ya Kukonda nsuka, mpe yandi pesaka dikabu na Nzambi, na lukwikilu, munkayulu ya kulutila mbote na yina ya Cain. Kifwani ya kulunga ya mabuundu bubu yayi: dibuundu ya kimuntu, dibuundu ya kimpeve. Mpe ya ke na ntembe ve ti mu ke tuba na bimvuka zole na ntangu yayi, mpe mu banza ti na nzila ya ba-bande mu ke tuba na makumi ya mafunda ya bawu.

<sup>29</sup> Kasi, beno tala, dibuundu ya yinza, ya kele kaka dibuundu ya nsuni. Bawu ke na lenda ve ya kumata na zulu ya mwa kima yina ya “Mu kotaka na dibuundu. Kana mu kwenda na yinzo-Nzambi, kana mu sala nionso mu lendaka sala, yawu yina kaka Nzambi ke lomba.” Ntangu yayi, yawu yina Cain salaka. Yandi kwendaka mpe salaka autel. Yandi salaka munkayulu, yandi nataka bambuma ya yinsi. Mpe yandi tubaka, “Yawu yayi, Nzambi. Yawu yina mu me kuzwa. Baka yawu to bika yawu.” Ya kele mutindu mukwikidi ya nsuni ke kwikilaka bubu yayi. “Mfumu, mu ke kwenda na dibuundu. Mu ke vukana na kimvuka ya kulutula kitoko yina mu lenda mona. Mu ke futa yina mu fwana futa na dibuundu. Mu ke sala yina kele mbote. Ntangu yayi, beno tala yina mu lenda sala. Mu ke sadisa na kusumba

makala samu na mufwidi. To, mu ke pesa bana mwa bilele.” Nionso yina kele mbote, mu ke telemina yawu ve. “Kasi yawu yina, yawu yina. Kana Nge zola yawu, baka yawu; kana Nge zola yawu ve, Nge fwana baka yawu ve.” Ntangu yayi, yina kele nkadulu ya dibuundu ya nsuni bubu yayi.

<sup>30</sup> Kasi dibuundu ya kimpeve! Abel, na nzila ya luzayikisu, na nzila ya lemvo, yandi monaka na zulu ya yawu, mpe na lukwikilu yandi pesaka na Nzambi munkayulu ya kulutula mbote na yina ya Cain. Mpe ya pesaka kimbangi ya ludedomo ya yandi, Nzambi.

<sup>31</sup> Kima ya mutindu mosi salamaka na Ismael na Isaac. Mosi vwandaka ya nsuni, mpe yankaka vwandaka ya Kimpeve. Mosi, ya kisadi ya kento; mosi, ya kento ya kimpwanza.

<sup>32</sup> Yawu salamaka mutindu mosi na Israel na Moab, mabuundu zole ya nene me vukana kintwadi. Mpe ntangu Israel vwandaka zola kwenda na kisika ya bawu ya nsilulu, dibuundu ya kimpeve, bantu ya Jacob, Israel vwandaka na nzila; Bantu ya Ésaü kutanaka na bawu, Moab, dibuundu ya ngolo. Mpe ntwadisi ya nene ya dibuundu, Balaam, kulumukaka samu na kusinga mpangi ya yandi ya bakala, kasi yandi monaka ti yandi lendaka singa ve mpangi ya yandi ya bakala. Yandi kubwaka, na kimpofu ya meso ya yandi, samu na kumona manaka yina ba soolaka ntete, na yina, mpe samu na kumona Ndinga ya Nzambi.

<sup>33</sup> Ntete, “Lukwikilu ke kwizaka na nzila ya kuwa, kuwa Ndinga ya Nzambi.” Na yina mukwikidi ke kuwa Yawu, ke ndima Yawu, mpe ke sadila Yawu. Muntu ya nsuni ke kuwa Yawu, muningu ya Yawu, kasi ata fioti ve. . . *Kuwa* zola kutuba “kubakula” Yawu. Beno tala, ya ke kutala kima mosi; kasi *kumona* yawu, ya kele “kubakula” yawu. “Kana muntu me butuka mbala zole ve, yandi lenda mona ve to kubakula Kimfumu ya Nzambi.”

<sup>34</sup> Ntangu yayi, awa me kwisa Israel, ba vwandaka kwisa na nsilulu ya Nzambi, ti ba vwandaka kwenda na yinsi ya nsilulu. Ve bantu ya kukwikama ve, kasi bakwikidi, bakwikidi ya Nzambi mosi yina Israël kuzwaka, basikaka samu na kumeka kusinga mpangi ya yandi ya bakala, samu yandi tubaka ti mpangi ya yandi ya bakala kele, ya kieleka yandi vwandaka ya kusungama ve samu yandi salaka mambu yina vwandaka mbote ve. Kasi, beno me mona, yandi lembanaka na kumona nsodolo.

<sup>35</sup> Kima ya mutindu mosi na Ésaü mpe Jacob! Ésaü monanaka mutindu muntu ya kulutula mbote. Yandi kulumukaka mpe salaka bima ya lutondo. Yandi—yandi vwanda keba papa ya yandi ya kiboba ya mpofu, yandi pesaka yandi nsuni ya niama mpe yandi vwandaka keba yandi, mpe yandi vwandaka mwana-bakala ya mbote. Bima mingi yina bakwikidi ya nsuni ke salaka na ndonga ya nsambululu, kusadisa bimvuka, mpe—mpe kufuta

ba-facture ya lupitalu samu na bantu, mpe bima ya nsambulu, kasi yawu yina ve mu ke tubila.

<sup>36</sup> Moab vwandaka mbote, yinsi ya nene, mpangi ya yandi ya bakala. Mpe Jacob salaka nionso, yandi vwandaka kimpumbulu; kasi dyaka yandi vwandaka na kima mosi ya kusala, yina vwandaka kuzwa nsilulu yina, bukuluntu yina. Awa kwisaka na Israel, bana ya Jacob, na lukanu mosi. Ntangu yayi nani ke vwanda ya kusungama?

<sup>37</sup> Balaam tungaka ba-autel sambwadi; na Israël ya vwandaka na ba-autel sambwadi. Balaam pesaka minkayulu sambwadi ya bibulu ya kukondwa mvindu; Israël pesaka minkayulu sambwadi ya bibulu ya kukondwa mvindu. Kuna, kana bawu baka yawu na mutindu ya yimbi, Moab vwandaka kaka musambidi mutindu Israel vwandaka, Ésaü vwandaka kaka musambidi mutindu Jacob vwandaka, mpe Caïn vwandaka kaka musambidi mutindu Abel vwandaka. Kasi, ya kele nsodolo kele yina ke simba mbote.

<sup>38</sup> Wapi mutindu mpofu! Wapi mutindu bana ya Ésaü vwandaka mpofu, na nonzolo ya kimpeve, bantu ya Moab, talaka na Israël mpe tubaka, “Tala bawu. Bawu ke denomination ve. Bawu ke nkonga ya bimpumbulu. Bawu ke zingaka na kati ya batenta. Mpe beto kele yinsi ya nene. Ba salaka yimbi. Mpe ba ke na organisation ve na kati ya bawu. Ba ke na kuyenga-yenga bisika nionso, na kulandaka profete.” Kasi yandi kondwaka na kumona Nyoka ya Kisengo mpe Ditadi yina ba bulaka na ntuala ya bawu. Yandi monaka ve nkonga yina ba me bokila na kubasika, nkonga yina ba soolaka yina vwandaka landa ntumunu ya Kinzambi ya Nzambi samu na yinsi ya nsilulu.

<sup>39</sup> Ya kele mutindu ya kele bubu yayi. Ba ke tuba, “Ya kele nkonga ya ba-exalté. Ya kele nkonga ya bantu yina kele *yayi, yina, to yankaka.*” Kasi bawu monaka ve ti yawu vwandaka landa nzila ya Ndinga ya Nzambi.

<sup>40</sup> Israel vwandaka na nzila ya yandi na yinsi ya nsilulu. Nzambi, na Ndinga ya Yandi, pesaka nsilulu.

<sup>41</sup> Jacob, kikuma samu na yawu ti yandi solaka na kuzwa bukuluntu yango, na mutindu nyonso, yandi zolaka kuzwa yawu, samu ti yandi zabaka ti bukuluntu vwandaka simba balusakumunu. Ya vwandaka simba luzingu. Yandi kipaka ve mutindu yawu kwisaka, kaka mutindu yandi kuzwaka yawu. Yina vwandaka kima ya ngudi. Wapi avion yina nataka yawu, ya vvwandaka na mfunu ve. Yandi zolaka yawu. Mpe yandi zolaka kuzwa yawu. Mpe yandi kuzwaka yawu. “Kiese na bayina ke na nzala mpe mpwila ya mambote, bawu ke fuluka.” Yandi vwandaka na nzila ya yandi, mpe yandi vwandaka sosa yawu, mpe yandi kuzwaka yawu.



42 Israel vwandaka kwenda na yinsi ya nsilulu. Ata lutangu ya bantu ya Moab mpe bansingulu yina bawu mekaka na kutula na zulu ya bawu, ba me kwenda mbala mosi na yinsi ya nsilulu.

43 Mpe bubu yayi beno ke vwanda ata fioti ve. . . wapi mutindu ba ke funda yandi, wapi mutindu ba ke niokula yandi, wapi mutindu yawu ke tuba mambu ya yimbi, wapi mutindu ba ke bokila yawu “exalté,” wapi mutindu bawu ke tubaka bima yina ya yimbi, dibuundu ke landila na kukwenda. Ya fwana sala yawu. Ya ke vwanda na kati ya Ndinga ya Nzambi.

44 Ntangu bantinu zole vukanaka kintwadi. Mosi ya bawu vwandaka Achab, muntu ya yimbi, yankaka yina vwandaka Josaphat; dibuundu ya kimpeve, dibuundu ya nsuni.

45 Achab vwandaka mukwikidi ya ndilu. Yandi vwandaka na bapofete. Bawu vwandaka ve bantu ya kukwikama ve. Bawu vwandaka ve bantu yina vwandaka sambila biteki. Bawu vwandaka bapofete ya Israel, kasi bawu nionso longaka mpe kudiaka mpe lwataka na nzila ya ntinu Achab. Yawu kumaka mutindu kisika yina bawu vwandaka na bima nionso ya politiki.

46 Josaphat kwisaka kuna, kulumukaka, salaka ngwisani, yina kele mbote ve.

47 Nge lendaka vukana ve na bantu ya kukondwa lukwikilu. Beto lenda ata fioti ve, ata fioti ve, kutula bankumbu ya beto na babuku ya mabuundu yina ke kwikilaka ve na Nsangu ya mbote ya muvimba. Ata fioti ve! Beno ke kota na mpasi.

48 Mpe bawu kotaka na mpasi. Mpe muntu yayi ya kusungama tubaka, “Beto fwana ntete ve kuyufula Mfumu, mpe kutala kana beto fwana kwenda na Ramoth na Galaad?”

49 Ntangu yayi beno tala mutindu diambu yayi vwandaka ya kulunga. “Beto me kuzwa Ramoth na Galaad. Ya kele kima ya beto, mpe bantu ya Syrie me botula yawu na Nzambi ya moyo. Beto lenda mata ve mpe kubaka yinsi yayi?” Mpe yandi salaka nzonzolo ya kitoko mingi, mpe na mutindu ya musiku, mpe na mutindu ya mbote, tii kuna Josaphat ndimaka yawu.

50 Mpe, bubu yayi, bantu lenda telama na chaire na mutindu ya mayele mpe kuzonza, mpe malongi, tii kuna bawu lenda tendula Ngolo ya Mpeve-Santu na nzila ya Biblia. Bawu lenda tendula kubeluka ya Kinzambi. Bawu lenda tendula bandinga ya malu-malu mpe ntendulu, bawu lenda tendula mbotika ya Mpeve-Santu, kele samu na kilumbu yankaka.

51 Kasi muntu yina me soolamaka na Nzambi, muntu mosi. . . “Mameme na Munu zaba Ndinga ya Munu.” Beno kele na nsodolo yina ya Nzambi na zulu ya beno, yawu ke kubwa ata fioti ve.

52 Josaphat tubaka, ntinu ya mbote tubaka, “Ya kele ve na profete, yina beto lenda yufula Mfumu?” Achab vwandaka kwenda kukondwa yawu.

53 Ya kele mutindu dibuundu nsuni ke na kusalaka bubu yayi. Oh, bawu kele na baseminere ya kufuluka na milongi, bantu ya nene, milongisi ya nene, ya mayela, ya kulutila, oh, la la, ntama kuna na zulu ya mpeve ya dibuundu ya kimu- . . . to dibuundu ya kimpeve.

54 Na bilumbu ya Noé, na bilumbu yina, beno tala dibuundu ya kimuntu. Yinki bawu vwandaka? Bantu ya mayele, mitungi, bantu ya mayele mingi. Kasi bantu ya kusolama, Énoch mpe Noé, vwandaka mivungi mpe ba-fermier, ya kukikulumusa, ya kulonguka ve, kasi bawu zabaka Nzambi ya bawu; kima mosi na kati ya bawu, ke sala, ke bokila. Beto ke kuma kuna na manima ya mwa ntangu fioti.

Ntangu yayi, na yina Josaphat tubaka, “Ya kele ve na profete?”

55 Oh, kieleka, yina ya nsuni kele na bawu. “Kieleka, beto kele na bawu. Mu kele na seminere na yisi awa, ya kufuluka na bawu.”

56 Yandi nataka bankama yiya. Ntangu yayi, bayayi vwandaka ve ya kukwikama. Bawu kele misambidi ya Yehowa-Nzambi. Yandi me mata, mpe bawu me tuba, “Beto vingila fioti mpe beto ke pesa profesi.” Mpe na yina bawu nionso vukanaka kintwadi. Mpe bawu vutukaka, “Ndinga ya Mfumu,” mpe bawu tubaka, “MUTINDU ME TUBA MFUMU.” Baprofete ya Israel. “MUTINDU ME TUBA MFUMU. Mata, Mfumu kele na nge. Mpe beno ke baka Ramoth na Galaad, samu ya kieleka ya kele ya Israel.” Mpe ntwadisi mosi ya babakala yayi sadilaka yandi bibongo zolé ya nene ya kisengo, mutindu ntwadisi, mpe yandi kwendaka kupusa. Yandi tubaka, “Na yayi nge ke vutula Israël. . . to ke tula bantu ya Syrie na ngaanda ya Ramoth na Galaad.”

Kasi, Josaphat, vwandaka na kima mosi na kati ya yandi!

57 Oh, mu ke na kivuvu ti Nzambi ke kotisa yayi na ntima ya beno. Ya kele ve na kima yina beno lenda longuka na beno mosi. Ya kele kima ve yina beno lenda tanga beno mosi. Ya kele yina Nzambi, na nzila ya nsodolo, ke salaka samu na beno. “Ve yandi yina ke kima mbangu to yandi yina ke lakisa- . . . Ya kele Nzambi yina ke talaka kyadi.”

58 Josaphat tubaka, “Bawu kele babakala yina me lwata bilele ya mbote.” Kukondwa ntembe yandi tubaka kima mutindu yayi, “Ba kele na ngangu, mpe bantu ya kulutila mayele yina mu me kuwaka ntete ve. Ba me longuka samu na ntangu yayi. Ba me telama na ngwisani. Ba kele na ngwisani ya nene na kati ya bawu. Mpe ba kele na mayele mingi, mpe ba kele na Kieleka mingi samu na bawu.”

59 Kifu nionso kele na Kieleka. Luvunu ya kulutila nene yina ba me tubaka ntete ve vwandaka na makumi yivwa- . . . [Kisika

ya mpamba na bande—Mu.] na zulu ya nkama mosi ya Kieleka na kati ya yawu, luvunu yina Satana tubaka na Eve.

<sup>60</sup> “Oh, ya kele na Kieleka mingi na yina ba ke tuba, kasi ya kele dyaka ve na mosi?”

<sup>61</sup> Mbote, yinki beno ke banza ti muntu yina tubaka? “Ntangu beto kele na nkama yiya awa, ya kulutila mayele, ya kulutila mbote? Bawu me basika awa ve na ntoto ya kuyuma yina ke mwa ndambu kinkonga, mpe yina me lwata mpusu ya mameme, to kima mosi. Ba kele bantu yina mu ke pesaka madia, mu me longusaka. Ba kele ve bantu yina zaba ve ABC ya bawu. Bawu kele bantu ya ndwenga, mpe ba zaba kima yango. Ba ke vwanda, kilumbu mpe mpimpa, ke tanga mikanda mpe profesi. Bawu zaba yina kele mbote. Mu kubikaka bawu. Mpe bawu kele ya kutelama awa na ntima mosi, bankama yiya ya bawu, ke na kutubaka, ‘Mata, Mfumu kele na nge.’”

<sup>62</sup> Kasi kana mu lendaka tanga mabanza ya Josaphat na mwa minuti fioti, “Ya kele kaka na kima yina ke tambula mbote ve,” yandi zolaka tuba. “Ya kele kaka na kima yina ke monana mbote ve. Ya kele dyaka ve na mosi, kisika mosi?”

<sup>63</sup> “Oh,” yandi tubaka, “yinga, ya kele na mosi dyaka, kasi yandi kele ve na organisation. Yandi kele muntu ya mutindu yankaka. Yandi ke kaka kimpumbulu.” Yandi ke mutindu Jacob. “Kasi beto lenda yufula yandi. Ba ke tuba ti yandi kele profete. Kasi mu ke tula ntembe na yawu, samu ti yandi ke tubaka ntangu nionso yimbi na munu, yandi ke tubaka *yayi, yina, to yankaka*, to ata mbala mosi ve ti yandi ke pesaka profesi ya mbote samu na munu.” Wapi mutindu yandi lendaka sala? Beno me mona?

<sup>64</sup> Na yina bawu tubaka, “Beto kwenda sosa yandi. Yandi kele mwana ya bakala ya Jimla.” Na yina bawu kwendaka mpe bakaka yandi.

<sup>65</sup> Mpe muntu mosi kutanaka na yandi na nzila, yandi tubaka, “Ntangu yayi, nge ke tuba kima mosi yina bawu me tuba. Nge fwana kuwisana na kimvuka. Kana ve, kyadi na nge!”

<sup>66</sup> Yandi tubaka, “Mu ke tuba kaka yina Nzambi ke tula na yinwa ya munu na kutuba, mpe kima yankaka ve.”

<sup>67</sup> Na yina na manima yandi mataka kuna, mpe ba pesaka yandi mpimpa mosi, yandi tubaka, “Mata, kasi mu me mona Israel ya kumwangana mutindu mameme ke na muvungi ve.”

Mpe Achab tubaka, “Mu tubaka na nge ve?”

<sup>68</sup> Ntangu yayi, ya kele na bankama yiya ya kuswaswana na mosi. Babakala bankama yiya yina ba me longusaka, ya mayele, yina me longukaka, ya ngangu yina vwandaka telemina mosi yina ya fioti me zaba kima ve, mutindu beto ke bokila yandi, Michée. Muntu mosi, kasi ntete muntu yina kuzwaka Ndinga ya Mfumu, yina salaka luswaswanu. Bawu nionso vwandaka ya luvunu, ya vwandaka lakisa luvunu. Samu na

yinki Michée vwandaka ya kuswaswana? Yandi zolaka vwanda mputu, samu na kuvwanda ya kuswaswana? Ve. Yina salaka ti Michée kuvwanda ya kuswaswana, yandi kangamaka na Ndinga. Ndinga ya Nzambi kele yina yandi vwandaka na yawu.

<sup>69</sup> Ntangu yayi ya me sila ti, na bilumbu yayi, “Nzambi ke tiamuna Mpeve ya Yandi.” Ba silaka na Daniel, ti, “Bantu, na bilumbu ntangu ditadi ke bula kifwani na dikulu, bantu yina zaba Nzambi ya bawu ke sala mambu ya nene.” Profesi na manima ya profesi! Mpe baseminere nionso, yinza, lenda basisa yawu ve. Nzambi ke sala yawu, na mutindu nyonso, mpe bantu ke landa yawu. Beno me mona? Nsuni mpe. . . Dibuundu ya kimuntu mpe dibuundu ya Mazulu. Beno me mona, Ndinga ke salaka luswaswanu.

<sup>70</sup> Yawu yina Jacob banzaka, “Mpe ata nyonso yina, mu zaba ti mu lenda vwanda ve ya kusakumuna kana tii mu ke kuzwa bukuluntu yina. Bukuluntu kele yina mu ke zola kuzwa.”

<sup>71</sup> Mpe, kasi Ésaü yinaka yawu, mpe bana ya yandi ke salaka kima mutindu mosi, dyaka, na kilumbu yayi. Ba ke yinaka yawu. Ya ke vwandaka ntangu nyonso mutindu yina.

<sup>72</sup> Ntangu nionso ya ke vwanda na reveil mosi, ya ke buta ntangu nionso mapasa. Yina ke mulabu mosi ya ngolo, kasi ya kele kieleka. Ntangu ya vwandaka na lubutuku, Isaac mpe Rebecca, ya butaka mapasa. Ntangu ba vangaka yinza, ya basisaka mapasa, bayinti zole. Mpe ntangu Caïn mpe Abel butukaka, ya butaka bantu zole. Ntangu Ismael na Isaac butukaka, ya butaka bantu zole. Mpe ntangu Ésaü mpe Jacob butukaka, ya butaka bitini zole. Mosi ya bawu, ya kimuntu (mosi ya bawu, ya ntoto); yankaka yina, ya Mazulu. Mpe mosi talaka ya kimuntu, ya mayele; yankaka tambulaka na Kimpeve. Ya ke vwandaka kaka mutindu yina ntangu nionso. Ntangu dibuundu ya ba-Lutherien kwisaka. . .

<sup>73</sup> Beto baka Pentecote, ntete. Beno tala lubutuku ya Pentecote. Ya me basisa reveil ya nene, ya ngolo yina ningisaka yinza ya Pentecote, yina me zabana. Ya vwandaka ntama mingi ve na manima ya Pentecote tii Paul tubaka, ti, “Ya ke vwanda na bantu yina ke telamaka na kati-kati ya bawu, na mambu ya kubeba, mpe yina ke nata bantu ntama na Nzambi.” Mpe ya kieleka yawu yina bawu salaka. Ya ke basisaka zole.

<sup>74</sup> Ntangu dibuundu ya ba-Lutherien kubutukaka, Martin Luther me basisa reveil ya kimpeve. Ntama mingi ve tii awa me kwiza Ésaü, kaka na manima ya yandi, mpe bongisaka yawu. Mpe ya basisaka zole.

<sup>75</sup> Na yina na manima ya yina, me kwisa Methodiste, John Wesley, reveil ya kimpeve. Mpe na manima ya yina, me kwisa organisation, me sala organisation. Mpe yawu me basisa zole.

<sup>76</sup> Mpe na manima ya yina, me kwisa Pentecote, reveil mosi. Mpe ntangu yayi ba me bongisa yawu, mpe ntangu yayi ba ke sukisa na organisation. Mpe ya ke basisa zole.

<sup>77</sup> Kasi mbuma yina ya kimpeve ya Nzambi ya moyo, ata ti ya fwana vwanda kizieti mosi, ata ti ya fwana vwanda muntu yina ke tambulaka mingi, ya ke nataka ntangu nionso kukabwana. Ésaü me wumela ntama mingi ve na Jacob. Kaka ntangu Jacob kuzwaka bukuluntu (lukumu na Nzambi), yina bokilaka na kukabwana. Mpe ntangu muntu . . . mu ke kipe ve yina dibuundu beno kele, kana ya kele nsuni, mpe bankundi ya beno yina beno ke tambulaka na bawu, bantu yina beno ke bulaka na bawu bakalati, mpe bimvuka ya beno ya mikanda, mpe nionso yina; ntangu beno me kuzwa bukuluntu, ti kima yina kele kuna na kati ya ntima ya beno yina kele na nzala ya Nzambi, ntangu beno ke kuzwa yawu, ya ke bokila na kukabwana. “Beno basika na kati-kati ya bawu, mpe beno vwanda ya kukabuka, me tuba Nzambi.” Kukabwana!

<sup>78</sup> Dibundu ke na kuvukanaka. Beno me mona, ya lenda kwenda ve. Ésaü vwandaka kifwanisu ya mbote ya muwikidi ya nsuni bubu yayi, ata mbala mosi ve lenda nunga yinza. Yandi ke nunga ve bima ya yinza. Bawu ke zolaka kaka balukutakanu ya bawu ya kulawuka malafu, makinu ya bawu, ba-manicure ya bawu ya ba-maquillage mpe, bakento, na bizizi ya bawu, mpe—mpe ke zengisa bansuki ya bawu mpe—mpe ke lwata mwa bilele yayi ya nkufi; mpe—mpe muntu ke zolaka kubasika na kivinga ya nsaka ya billard, mpe—mpe ke kunwa makaya, mpe ke tuba mwa bima ya mvindu; mpe kele dyaka bantu ya dibuundu. Ata mbala mosi ve ti bawu lenda nunga bima yina. To Ésaü lendaka ve kusala yawu. Kasi ata mutindu yina, samu na kuvwanda musambidi, yandi lendaka vwanda na mutindu ya mabanza ya kimuntu. Ya kele kima mutindu mosi dibuundu ke salaka bubu yayi. “Beto ke kuma organisation. Beto ke vukana beto mosi kintwadi. Beto ke sala kiziku mosi, to mwa kimvuka mosi, to kima mosi ya mutindu yina.”

<sup>79</sup> Mpe ya kele mutindu dibuundu ke tambula bubu yayi, ya kimpeve mpe ya nsuni, dyaka mutindu mosi. Yawu me sobaka ve, mpe yawu ke soba ata fioti ve.

<sup>80</sup> Busantu ya Nzambi. Nzambi, na kuvwandaka Nzambi, ke kotisa yawu, Yandi mosi. Kana ya vwandaka ve na nsumuki, ya zolaka vwanda ata fioti ve. . . Yandi zolaka vwanda ata fioti ve na Mvulusi. Kasi Yandi vwandaka Mvulusi na mbandukulu, na yina ya vwandaka ve na kima ya kuzimbana. Mpe bisalu ya Yandi Mosi na kuvwandaka Mvulusi, ya salaka nsumuki, ya zolaka vwanda na kima mosi samu na kuvuluka. Ntete ya kuzwa kima yina ke kuzwa mpulusu, ya zolaka vwanda na kima yina zolaka zimbana. Mpe ludedomo ya Yandi mpe busantu ya Yandi! Kana ya vwandaka ata fioti ve na muntu ya kubela, Yandi zolaka vwanda ata fioti ve munganga. Kasi kubanda mbandukulu, mpe

ya mbandukulu, Yandi vwandaka na ntwala ya mbandukulu. Yandi vwandaka munganga. Na yina ya vwandaka ve na kima mosi ya kubela, na yina ya vwandaka talisa muntu ya kubela, ti Yandi lendaka belusa bawu, samu na kusala Yandi munganga.

<sup>81</sup> Kaka na Nzila ya Santu yina kuna kwisaka mpulusu, kwisaka nsingulu. Na nzila ya mama mosi mpe tata yina salaka Jacob, yina salaka Ésaü. Beno me mona? Ya kele Nzambi. Yandi lenda ve kusoba dikani ya Yandi. Ba fwana kwenda kaka mutindu mosi. Nkadulu nyonso ke vukana kaka na kati ya yawu. Ya fwana salama. Beno me bakula yina mu zola kutuba? Beno kota na yawu mbala mosi. Ya fwana vwanda na muntu yina me zimbana, samu na kuzwa mpulusu. Mpe kana ya zolaka vwanda ve, Yandi, ya Yandi. . . Yandi na kuvwandaka Mvulusi yina me sala yawu. Mudindu ke bokilaka Mudindu.

<sup>82</sup> Mutindu mwana-bakala yina ya ntwenia mu ke tubilaka ntangu nionso, yina vwandaka kudia gomme na kilapi, mpe pédale ya vélo, yandi vwandaka na nsatu ya sufulu. Mpe ntangu nionso ya vwandaka na kima mosi na kati kuna yina vwandaka na nsatu ya sufulu, ya zolaka vwanda na sufulu kisika mosi kuna, ntete, yina me salama. Ya zolaka vwanda ntete na sufulu ntete yandi ke vwanda na nsatu. Mpe yawu, sufulu, bendaka yandi, na yina yandi kwendaka sosa sufulu.

<sup>83</sup> Ya kele mutindu Nzambi kele Mvulusi. Mpe ya zolaka vwanda na kima ya kuzimbana, samu na Yandi kuvuluka, samu na kusala Yandi Mvulusi. Yawu yina nionso ke sala, ke sala kisalu ya Nzambi. Bima nionso, nionso kele na kati ya Yandi; ve na mulongi, na dibuundu ve, na organisation ve, kasi na Nzambi, ti nsodolo lenda vwanda ya kulunga. Beno me mona? Ya kele na kati ya Yandi. Yinga. Luthérien. . .

<sup>84</sup> Mpe kuna beto ke mona kukabwana yankaka, ya vwandaka Abraham mpe Lot. Bawu vwandaka bampangi. Kasi Lot vwandaka mubanzi ya nsuni. Yandi vwandaka ntangu nionso na ngaanda samu na kima mosi ya nene, kima mosi na mingi ya mingenzi na zulu ya yawu. Kaka mutindu dikaku, mutindu mu ke tubaka, ntangu nionso ke sosaka kima yina ke sema. Mpeve yina me bikaka ve bantu, bubu yayi. Ba ke simba. . . Ba ke kwenda na mbanza, mpe ba ke vwanda ve na mwa yinzo ya fioti mutindu yayi. Beno me mona? Bawu zola dibuundu ya kulutila nene yina kele na mbanza, pasteur ya kulutila mayele, kisika bantu yina ke lwataka bilele ya kitoko ke kwendaka, kisika mfumu ya mbanza ke kwendaka, na mbanza. Ya kele dyaka mpeve yina ya Ésaü. Ya kieleka yandi kuzwaka bukuluntu, na kubanda, samu na kukibokila bawu mosi Dibundu, kasi bawu ke zimbisa yawu samu ti bawu ke vvenzaka Yawu. Beno lenda ve kunata bantu na kufukama, mpe kudila mpe kulomba na Nzambi, mpe ke basika mpe ke vwanda na lukutakanu ya kubeluka ya nzutu, mpe ke kanga ntima na lukwamusu ya yinza, ke kuzwa Mpeve-Santu. Mpe bawu—bawu ke sala yawu ve.

Bawu ke kipake yawu ve. Bawu ke bokilaka yawu “nkonga ya ba-exalté.” Kaka yina Biblia ke tuba ti bawu ke sala. Bawu ke sala yawu samu ti ya kele nkadulu ya bawu. Ya kele nkadulu. Mutindu ngoyi-ngoyi mpe yembe, bima zole ya yinza. Bawu ke na nsatu ya yawu samu ti ya kele yina bawu kele. Ata fioti ve ti bawu ke (ata fioti ve) ke mona yankaka, samu ti bawu me butukaka ve samu na kumona yawu.

<sup>85</sup> Mpe yankaka yina, beno lendaka ve kunata yandi ntama na yawu, samu ya kele nsodolo ya Nzambi. Yandi me butukaka samu na kuvwanda bakala ya kimpeve to kento ya kimpeve. Kima mosi na kati ya yandi ke bokilaka yawu. Oh, mu—mu banza ti yayi ke kuma na kisika yina beto lenda, beno lenda mona yina mu—mu zola tuba, na kufikaka yawu na ntangu yayi. Ntangu yayi Abraham . . .

<sup>86</sup> Beno bambuka moyo, ntangu nyonso yina bawu vwandaka kintwadi, dibuundu ya kimuntu mpe dibuundu ya kimpeve, ata mbala mosi ve ti bawu kuzwaka lusakumunu. Jacob vwandaka ata mbala mosi ve ya kusakumuka tii yandi kabwanaka na Ésaü. Mpe Abraham vwandaka ata mbala mosi ve ya kusakumuka tii yandi kabwanaka na Lot.

<sup>87</sup> Lot vwandaka na mwa balukutakanu ya bisambu na yinzo-Nzambi na yandi kuna, yandi longaka na bana ya yandi ya babakala mpe bana ya yandi ya bakento, mpe bayankaka. Kasi yandi zingaka luzingu ya mutindu yina, tii kuna, ntangu yandi kotaka na kuzonzila nsuka ya ntangu, ba sekaka yandi.

<sup>88</sup> Kima ya mutindu mosi bubu yayi! Beno ke tubila kubeluka ya Kinzambi mpe ngolo ya Nzambi, mpe nionso yina, bawu ke seka yawu. Ya kele mpeve ya mutindu mosi. Yina kele bampeve nyonso zole ya nene, ya nsambulu, me kuzwa yinza na maboko; mukwikidi mpe muntu ya kukondwa lukwikulu, mukwikidi mpe mukwikidi ya kati-kati, yina ke mekula yina yankaka. Ntangu yayi ntangu Abraham kabwanaka . . .

<sup>89</sup> Beno me bakula Yesu? Na nzonzolo ya Yandi ya Nkwizulu, Nkwizulu ya zole, Yandi tubaka, “Mutindu ya vwandaka na bilumbu ya Noé, ba ke vwanda na kudya, ke kwelana, kunwa, mpe ke pesa na makwela.” Kasi ntangu Yandi tubaka na bilumbu ya Lot, Yandi tubaka ata kima mosi ve samu na yawu. “Mutindu bilumbu ya Lot,” ya kele samu na luzayikisu.

<sup>90</sup> Beno tala yina salamaka na bilumbu ya Lot. Ya vwandaka na Lot kuna na Sodome, ya kuvwanda mbote, na mayele, yandi kumaka, mosi ya bantu ya nene ya mbanza, zuzi, yandi vwandaka na kati ya mielo mpe vwandaka fundisa bantu. Kento ya yandi vwandaka na bimvuka nionso yina vwandaka na mbanza. Mpe bana ya yandi ya bakento, mpe bawu nionso, me kwelaka bantu yina me zabana mingi, ya ngangu, yina me longukaka mingi, ya mayele, ya kimpeve. Mpe Abraham

vwandaka zinga na kati ya tenta na nsi ya yinti ya chène. Kasi kilumbu mosi ba kwisaka kutala bawu zole.

<sup>91</sup> Mpe ya vwandaka na mulongi mosi ya mayele yina kwendaka kuna mpe longaka, mpe bokilaka bawu na kubasika. Beno tala—beno tala nsangu, “Beno basika,” yandi tubaka na Lot.

<sup>92</sup> Mpe ata mbala mosi ve ti ba zolaka bokila yandi kana ya vwandaka ve samu na kyadi ya Abraham. Yandi tubaka, “Mu lenda kuzwa bantu makumi tanu, Nge lenda keba bawu? Mu lenda kuzwa bantu makumi tatu? Mu lenda . . . Kana mu lenda kuzwa kumi?” Ya kele ntama mutindu yandi zolaka kwenda. Mpe Yandi lendaka ve kumona kumi na kati ya bawu.

<sup>93</sup> Kuyituka ve, “Mutindu ya vwandaka na bilumbu ya Noé.” Beno bambuka moyo, Noé vwandaka ve kifwani ya Dibuundu; Enoch vwandaka, yina lutaka ve na lukwamusu, kasi ba zangulaka yandi na ntuala lukwamusu kubanda. Enoch kwendaka na Yinzó, yandi lutaka ve na lukwamusu. Noé simbaka mbote.

<sup>94</sup> Ntangu yayi, beno tala mbote ntangu yayi na yina beto ke na kukota na yayi. Beno tala mbote wapi mutindu ya kidimbu ti Abraham mpe dibuta ya yandi kuzwaka. Bawu me kuzwa yina ya Mazulu. “Abraham!” Wapi mutindu Yandi zabaka ti yandi vwandaka Abraham? “Wapi kento ya nge, Sarah?” Wapi mutindu Yandi zabaka ti yandi kwelanaka, to kuzwaka kento, Sarah?

“Yandi kele na kati ya tenta.”

<sup>95</sup> Ntangu yayi, Muntu yina me vwanda kuna, vwanda kudya musuni, vwanda kunwa miliki, mpe vwanda kudya dimpa ya masangu. “Wapi kisika, kento ya nge kele, Sarah?” Wapi mutindu Yandi zabaka kima yina? Wapi mutindu Yandi zabaka yawu? Beno banza na yawu. Beno ke bokila . . . Beno bantu ya kimpeve, beno bika yayi kukota na beno. Wapi mutindu Yandi zabaka yawu, ntangu Yandi ke salaka mutindu nzenza, putulu na bilele ya Yandi?

Mpe ntangu Abraham tubaka, “Yandi kele na kati ya tenta, na manima ya Nge.”

<sup>96</sup> Mpe Yandi tubaka, “Mu ke . . .” “Munu, munu,” kiyingilu kimuntu. “Mu,” Muntu yayi, Nzambi ke kukitalisa Yandi mosi na nzutu. Nzambi! Abraham bokilaka Yandi Elohim. “Mu, mu ke kwisa tala nge. Mu ke zitisa nsilulu ya Munu. Mpe landila ntangu ya luzingu, mu ke kwisa kutala nge, mpe nge ke kuzwa mwana-bakala yayi yina mu tubaka na nge.” Mpe Abraham, na bamvula nkama mosi; Sarah, na bamvula makumi yivwa.

<sup>97</sup> Mpe Sarah, kuna na manima na kati ya tenta; pene ya batenta yiya, tenta ya ngudi ya kuvwanda kuna na manima. Na manima ya kinkuku, yandi vwandaka widikila. Yandi kuwaka yawu. Mpe yandi sekaka na kati ya ntima ya yandi, yandi tubaka,



“Munu, kento mosi ya kiboba ya bamvula nkama mosi, mpe mfumu ya munu,” bakala ya yandi, “mfumu ya munu, mpe kiboba, mpe kubanza ti beto ke sepela diaka kintwadi, mutindu bantwenia yina me kwelana? Oh, wapi mutindu ya lendaka vwanda?” Mpe yandi sekaka fioti.

<sup>98</sup> Yandi vwandaka na mukongo ya Yandi ya kubaluka na tenta. Yandi tubaka, “Samu na yinki yandi me seka?” Oh, mpangi-bakala, beno bawu yayi!

<sup>99</sup> Beno tala dibuundu ya nsuni yina ke longaka Nsangu ya mbote na bawu. Billy Graham ya bilumbu yayi mpe bayankaka kuna ke na kulongaka Nsangu ya mbote, “Beno basika na yawu!” Kasi ba basikaka? Ve. Ya kieleka, ya kieleka, bantu fioti.

<sup>100</sup> Beno tala mbote nkonga ya Abraham, yina ba me bokila na kubasika. Ntangu yayi beno tala. Mpe Yandi pesaka yandi kidimbu yayi, mpe yandi kwikilaka na Yandi. Mpe Yandi me zimbana na ntuala ya yandi, mpe me kwenda. Oh, wapi mutindu ya ke vwandaka ntangu nionso ya kukabwana, lubokilu na kubasika!

<sup>101</sup> Ntangu yayi, bampeve nyonso zole yayi. Samu na kusala nswalu na beno, samu na kusala nswalu ntangu yayi samu na kukuma na kisika yina mu zola beno kumona. Bimvuka yayi zole me vukana pene-pene, na kati ya bansungi, kubanda na mbandukulu ya ntangu; dibuundu ya kimuntu, dibuundu ya kimpeve. Bawu vwandaka na kati ya Ngwisani ya Ntama, bawu vwandaka na kati ya Ngwisani ya Malu-malu, mpe bawu kele dyaka bubu yayi.

<sup>102</sup> Ntangu yayi, na kutala bamvula mafunda zole me luta, ya me kuma na yintu, mpe ya vwandaka mata na kati ya bantu zole: mosi ya yawu, Yesu Klisto; yankaka yina, Judas Iscariot. Ntangu yayi, Yesu ke sala ngwisani na Nkwizulu, Nkwizulu ya Yandi ya zole, ti bampeve nyonso zole yayi zolaka vwanda ya kuswaswana na yina bawu vwandaka na manima kuna. Ntangu yayi awa kele kisika mu zola ti beno lwata bilele ya beno—ya beno ya Nkembo. Bampeve yayi zole ke vwanda ya kuswaswana. Samu, Satana kwisaka mpe zingaka na muntu yina vwandaka mambele ya dibuundu, Judas Iscariot, zingaka na dibuundu ya nsuni, mpe vwandaka nkundi ya dibuundu ntangu nyonso. Kasi yandi kwisaka mpe—mpe vunaka, to me banzaka ti yandi vwandaka vuna mpangi ya yandi ya bakala. Yandi kwisaka mpe kotaka samu na kuvwanda mosi ya bawu; mekaka bima ya mbote ya Nzambi, kwendaka mbala mosi na ntuala na Mpeve, ya monana ti, yandi basikaka mpe longaka Nsangu ya mbote, mpe basisaka bampeve ya yimbi. Kasi kuna na kati ya yandi, ntangu nionso, yandi vwandaka Judas, na kubanda. Biblia ke tuba, “Yandi butukaka muntu yina ke zimbana.”

<sup>103</sup> Ntangu yayi beno bambuka moyo, ya kele na dibuundu ya nsuni na manima kuna, Ésaü, ba-Pharisien mpe ba-Sadducéen.

<sup>104</sup> Kasi beno tala mbote muntu yayi yina ke banzaka ti yandi kele kaka . . . Yandi ke tambula na Nsangu na mwa ntangu fioti, kasi yandi ke zola kaka ve kutula mingi diboko ya yandi na zulu ya Yawu. Beno me mona bampeve yayi? Yesu tubaka, “Ya ke vwanda pene-pene mingi na kima ya kieleka, ya ke vuna bantu ya kieleka Musolami.” Musolami, kana beno tala yawu, “kana ya lendaka salama.” Kasi ya lenda salama ve. Beno me mona, ya ke vuna.

<sup>105</sup> Ntangu yayi beno tala, ve kaka dibuundu ya nsuni, yina ya ngaanda kuna, dibuundu ya nsuni ya mumesanu, kimvuka ya Esai.

<sup>106</sup> Beto kele ntangu yayi na kimvuka ya Judas, yina kele muteki kulutula mingi, muteki kulutula mingi, yina me kwisa mbala mosi na maboko ya lusakumunu. Kaka mutindu na Hébreux 6 mpe 10, mutindu yandi tubaka, “Bayina me belama mpe me meka bangolo ya yinza yina ke na kwiza, mpe me sala bima nyonso yayi; kana . . . na manima kana bawu me kuyamba luzabu ya Kieleka, na yina kana bawu me yambula na luzolo ya bawu.” “Na luzolo,” yinki ya kele? “Kutala Menga ya ngwisani, kisika ba me santisa bawu, kima ya kukondwa busantu.”

<sup>107</sup> Bika mu pesa beno kifwanisu mosi. Yawu yayi. Bakala yayi, yandi ke muntu mosi ya mbote, mwana-bakala ya mbote. Ba me bokila yandi, yandi ke kuwa na kati ya ntima ya yandi ti yandi zola kuvwanda longi. Mbote mingi, yandi ke ndima Yesu mutindu Mvulusi ya yandi mosi. Yandi kele mwana-bakala ya mbote, muntu ve lenda tuba kima ke telemina yandi. Na manima ya mwa ntangu fyoti, dilongi ya kusantisama. Bakala yina ke lulaka ntangu yandi ke talaka bakento. Yandi . . . Ya kele na kati ya yandi. Beno me mona? Mpe kuna, kima yankaka, mbala yankaka yandi ke nwaka makaya, mpe yandi ke zolaka kunwa makaya. Mu banza yandi ti yandi ke zolaka kubula bansaka ya mbongo. Mu banza ti yandi ke zolaka kusala mambu ya yimbi. Yandi zaba ti yandi ke zolaka ve kusala yawu, na yina yandi ke tuba, “O Nzambi, tula Menga ya Yesu na munu, mpe santisa munu.”

<sup>108</sup> Mpe yandi me kuma ya kusantisama. Yandi lenda boka, kukumisa Mfumu, kusala mwa bima, mpe, kubasika mpe kusala mambu. Beno bambuka moyo, Yesu tubaka ti kifwani yina ke vwanda kuna na kilumbu yina. “Bantu mingi ke kwisa mpe ke tuba, ‘Mfumu, mu pesaka profesi ve, mu longaka ve? Mu basisaka bampeve ya yimbi ve, na Nkumbu ya Nge?’” Yesu tubaka, “‘Mu zabaka beno ve, beno bisadi ya masumu ya nkú.’” Beno me mona, bawu yayi.

<sup>109</sup> Ntangu yayi beno tala mbote yayi ntangu yayi. Beto me kuma na kusala nkama ya mafuku na nsuki mosi, tii na nsongi ya meno ya Nsangu ya mbote, “Ya meno mingi kulutula mbele ya meno zole, ke zenga tii na butomfo ya mikwa,

mpe Muswasikisi ya mabanza!” Alleluia! Nzambi, bika yawu kulandila. “Muswasikisi ya mabanza ya yintu.” Yina ke Nsangu ya mbote, Ngolo ya Nzambi. Ndinga ya Nzambi me monisama kele Nsangu ya mbote.

Beno ke tuba, “Biblia tubaka. Ya kele—ya kele Ndinga ya Nzambi.”

<sup>110</sup> Mbote, Ndinga me monisama kele Nsangu ya mbote. Nsangu ya mbote kwisaka ve na beto na nzila ya Ndinga kaka, kasi na ngolo mpe kumonisama ya Mpeve-Santu, samu na kutalisa Ngolo, kusala ti Nsangu ya mbote kuzinga.

<sup>111</sup> Ntangu mu kwendaka na Inde, archevêque ya—ya dibuundu ya ba-Methodiste basikaka, yandi tubaka, “Tata Branham, beto zola zaba kima ve na yina me tala kumwangisa nsangu. Beto zaba mingi na yina me tala Biblia kulutila beno nionso ke zaba.” Yandi tubaka, “Beto vwandaka dibuundu, mpe beto vwandaka awa bamvula mafunda zole na ntwala beno kuma yinsi.” Ya kieleka. Kasi yandi tubaka, “Beto ke kuwa ti Nzambi me kwisa tala nge mpe me pesa dikabu yina lenda sala ti Biblia yayi kuzinga.” Yandi tubaka, “Yawu yina beto ke sepela na yawu.” Oh, la la! Beno me mona, bakala yina vwandaka mwana-bakala, mutekolo ve, mutindu David tubaka. Beno me mona? “Beto zola kuzaba. Ya kele kieleka?”

<sup>112</sup> Mu tubaka, “Ya kieleka, ya ke ya kieleka. ‘Yesu Klisto mutindu mosi mazono, bubu yayi, mpe kukonda nsuka.’”

<sup>113</sup> Ntangu yayi, beno tala yandi, dibuundu ya kimuntu vwandaka talisa dibuundu ya kimpeve. Ntangu yayi, beto ke mona ti Judas ke na kutalisa ti yandi kele mpangi-bakala, mpangi-bakala, mpe na manima yandi mataka na zulu mpe na nsuka kumaka na kisika ya nsuka.

<sup>114</sup> Ntangu yayi beno tala mbote mulongi yayi ya ntwenya. Yandi ke kuma na kisika mosi, yandi ke tuba, “Mfumu, mu vwanda tala bakento. Mu zolaka sala yawu ve. Mu vwandaka, beno zaba, mutindu mu vwandaka sala bima ya yinza. Mu zolaka sala yawu ve. Mu vwandaka basisa mbongo ya munu na mbangu ya bampunda. Mu—mu zolaka sala yawu ve. Mu—mu vwanda tambula konso nkokila na cinema. Mu zolaka sala yawu ve. Mu ke sepela kaka na bafoto ya nsoni mpe bima ya mutindu yina, mu ke na ba pin-ups na kati ya kivinga ya munu. Mu zolaka sala yawu ve. Ya kele bima ya yinza. Santisa munu, Mfumu!”

<sup>115</sup> Mpe Mfumu tubaka, “Mbote, mu ke sala yawu.” Yandi ke tula Menga ya Yesu Klisto mpe ke santisa yandi.

<sup>116</sup> Na yina, ntangu yandi ke sala mutindu yina, na nkokila mosi yandi ke luta mpe yandi ke kuwa kima mosi. Yandi ke kwenda kuna mpe ke widikila. Yandi ke kuwa mbotika ya Mpeve-Santu, kufuluka ya Mpeve. Na yina yandi talaka yawu, “Oh, la la, ya ke mbote ve! Kasi, tala, yina ke bebisa ministere ya munu kana mu longa yawu. Yina ke sala ti mama kubasisa munu na yinzo. Ba ke

basisa munu na dibuundu ya munu kana mu me kota ve kuna na kati. Oh, mu ke sala mbote na kukwenda ntama na yawu. Kasi beno bika mu tala yawu. Yinga, ya kele Kieleka, Biblia.”

117 Mbote, mutindu mulongi mosi ya lukumu, yina me zabana na yinza ya muvimba, ntama mingi ve ba monaka yandi (na muntu yina vwandaka na munu na Porto Rico) me fukama, yandi vwandaka tuba bandinga ya malu-malu, na Londres, na Angleterre; bakala mosi ya ngolo, mosi ya ba-evangeliste ya kulutila nene na yinza bubu yayi. Mpe bakala yayi, mpangi ya yandi ya bakala yina vwandaka na munu awa, bakala yina me fuluka na Mpeve, yandi kwendaka mbangu mpe tubaka, “Oh, mpangi-bakala, kaka yina.”

118 Yandi tubaka, “Mu zaba yawu. Mu zaba yawu. Kasi, tala, bika mu tuba na nge kima mosi.”

119 Yandi tubaka, “Longa yawu ntangu yayi. Longa yawu. Ngunga yawu yayi. Na kuzabana ya nge, nge lenda ningisa yinza.”

120 Yandi tubaka, “Ve, mu lenda ve kulonga yawu. Beno me mona, dibuundu ke basisa munu. Mu lendaka longa yawu ve. Mu lendaka sala yawu ve.” Oh, mpangi-bakala!

121 “Me ku- . . . mbala mosi me santisama mpe me kuzwa luzabu ya Kieleka, me tala Yawu, me mona ti Yawu kele kieleka; mpe bawu ke baluka, na kumonaka ti bawu ke na kukomaka na kulunsi bawu mosi Mwana ya Nzambi, mpe tula Yandi na nsoni ya nene, na nsoni ya Nsangu ya mbote.”

122 Paul tubaka, “Mu ke na nsoni ve ya Nsangu ya mbote ya Yesu Klisto, samu Yawu ke Ngolo ya Nzambi samu na mpulusu.” Ya kele Ngolo ya Nzambi ke na kusala na kati ya Dibuundu ya Yandi.

123 Kasi bawu tubaka, “Mu lenda sala yawu ve.” Muntu yayi tubaka, “Bawu ke banza ti mu ke pentecotiste. Bawu ke sala ti munu. . .” Yandi tubaka, “Lukumu ya munu—ya munu ke beba.” Oh, mpangi-bakala!

124 Mu ke na lukumu ve. Mu ke banza samu na lukumu ya Yandi. Lukumu ya Yandi, ya kele Yandi.

125 Kasi beno me mona mutindu bawu lendaka kukuma pene-pene na Yawu, beno zaba, “Mpe kutala Menga ya ngwisani yina me santisa yandi, kima yina santisaka yandi mpe basisaka yandi na yinza, mpe mekaka na kutula yandi Awa. Mpe na yina yandi ke tala Yawu, mpe kele na luzabu ya Yawu. Kuyambula Yawu, ya kele dyaka ve na munkayulu samu na disumu,” me tuba Biblia, “kasi ya me bikana kaka na kulingilaka na boma nyonso lufundusu yina Nzambi ke sala mpe tiya ya ngolo yina ke yoka bambeni ya yandi. ‘Samu ti kitumbu kele na munu,’ me tuba Mfumu. Yandi yina me vwenza musiku ya Moise, kufwaka kukondwa mawa, na nsi ya bambangi zole to tatu. Wapi mutindu

ya kitumbu ya kulutila, mpe kitumbu ya kulutila mpasi, ata ti ya kulunga, samu na longi yina diataka Menga ya Yesu Klisto na nsi ya makulu ya yandi, na manima yandi me yamba luzabu ya Kieleka, mpe me tala Yawu mutindu kima ya kukondwa busantu ve.” Fiou!

<sup>126</sup> Beno me mona kisika beto kele? Yesu tubaka, “Beno sala keba.” Beno me mona mutindu Judas vwandaka? Yandi vwandaka ya kusungama na bawu. Yandi vwandaka Ésaü, yina ba salaka ya kulutila nene samu na nsungi yayi. Yandi vwandaka muntu ya luvunu, mumekudi, yina ba me sala ya kulutila nene samu na nsungi yayi. Awa yandi kwisaka, dyaka, mpangi-bakala ya Yesu, ti mpangi mosi ya bakala. Kasi na kati ya ntima ya yandi, yandi vwandaka na dibuundu ya ntama ya nsuni ntangu nyonso, samu ti ya kele kisika yandi tekisaka Yesu. Yandi tekisaka Yesu, bukuluntu ya yandi, kaka mutindu Ésaü salaka samu na dilonga ya madesu. Yandi me tekisa bukuluntu ya yandi na bambongo makumi tatu ya kisengo.

<sup>127</sup> Mingi ya babakala mpe bakento bubu yayi me tekisaka bukuluntu ya bawu ya kimpeve samu na kuzabana, mwa kima ya yinza beno yina beno me nungaka ata fioti ve; mwa bakento, ya bantwenia, ke tula maquillage na bansuki ya kuzenga, ke lwata bilele ya nkufi; babakala, samu na mwa bansaka ya mvindu mpe kunwa makaya, kima ya yinza. “Kana beno zola yinza to bima ya yinza, zola ya Nzambi kele ve na kati ya beno,” me tuba Biblia.

<sup>128</sup> Mu zola kunyongisa beno ve, kasi beto me kuma na nsuka. Beto ke mata ntangu yayi, beto ke mata na kikalu na nswalu ntangu yayi.

<sup>129</sup> Beno me mona mutindu ya kele? Ba ke salaka yawu. Ba zabaka bawu na ntwala. Ba lendaka mekula bawu mpe kuvwanda kaka ya lembami mpe ya kukikulumusa, kaka pene-pene, mutindu Baklisto, ya ke vwanda pene-pene mingi ti ya ke vuna Musolami ya kieleka; kasi na bambuma ya bawu beno ke zaba bawu.

<sup>130</sup> Kento ke lwata bakupe, ke monana ata fioti ve mutindu Muklisto, samu na munu. Biblia me tuba, “Ya kele disumu mpe kima ya nsoni samu na kento na kuzengisa bansuki ya yandi.” Kaka kento mosi na kati ya Biblia yina pakulaka kizizi ya yandi, ya vwandaka Jesabel.

<sup>131</sup> Wapi mutindu babakala, beno babakala yina fwana vwanda babakala ya Baklisto, mpe beno ke bika bakento ya beno kusala yawu? Ntangu, Nzambi ke tula yawu na zulu ya beno! Bakala ve! Nsuni! “Oh, mu ke basika kuna mpe mu ke kuma mosi ya dibuundu yayi.” [Kisika ya mpamba na bande—Mu.] “. . . beno ke banza samu na yawu.” Ya kele kaka kieleka yina Masonuku ke tuba ti bawu ke sala, mpe ya kele kaka kieleka yina bawu salaka. Mpe yawu yina bawu ke sala, kukakula!

<sup>132</sup> Muntu mosi tubaka, “Billy, kana nge sukisa yawu ve, nge ke tinisa bantu nionso.”

<sup>133</sup> Ya kele na Kima mosi yina ke tambula mbote ve, Mpeve-Santu, samu ti Yawu kele Ndinga ya Yandi. Mpe mukwikidi ya kieleka yina ba zabaka na ntwala ke kwenda ve, samu Yawu kele Madia samu na moyo ya yandi. Yandi ke zolaka Yawu. Kima ve lenda nata yandi ntama na Yawu. Yandi ke sala kima mosi, mutindu Jacob, kasi yandi zola bukuluntu yina. Yandi ke telama kuna. Mu ke kipe ve kana ya ke lomba bankundi nyonso yina kele na yandi, kana ya ke lomba kisalu ya yandi, kana ya ke lomba dibuundu ya yandi, kana ya ke lomba nionso. Yandi ke kangama na yawu, samu ti yandi lenda ve kukanga ntima na yawu. Ya kele na kima mosi na kati ya yandi, yina ke nataka yandi, mudindu ke bokila Mudindu. Oh, beno bawu yayi, kima mosi na kati ya yandi!

<sup>134</sup> Beno tala, nyonso yina beno zola kutala na Biblia, mpe beno baka yawu awa, beno vutuka na Genèse mpe beno ke mona kisika ya me basika, beno tala kisika ya me katuka. Bampeve nionso mpe ba-mouvement nionso bubu yayi beno vutuka na Genèse. Yawu yina beto me sala, samu na kulakisa beno bima yayi yina beno ke na kumona, bankundi. Beno zimbana yawu ve. Beno bika yawu ve kuluta na zulu ya yintu ya beno. Beno bika yawu kota na kati ya beno. Ya kele bima ya Nzambi. Ya ke kwisa na yintu; mpe Yesu zabisaka na ntwala ti ya ke vwanda diaka na yintu na bilumbu ya nsuka, mpe ya ke vwanda na nzila ya yayi: Kidimbu ya Nzambi, mpe kidimbu ya kibulu; bangolo zole ya kimpeve ke na kusala kintwadi.

<sup>135</sup> Ntangu yayi, muntu nyonso zaba ti Kidimbu ya Nzambi kele bukuluntu, mbotika ya Mpeve-Santu. Ephésiens 4:30, me tuba, “Beno niongisa Mpeve-Santu ya Nzambi ve, yina pesamaka na beno kidimbu tii na kilumbu ya mpulusu ya beno.” Ntangu bawu butukaka diaka, bawu wandaka ya kifuluka na Mpeve-Santu. Mpeve-Santu kele Lubutuku ya malu-malu, beto zaba yawu. Beno kele—beno kele ya kubutuka na Mpeve, mu ke ndima yawu. Kasi tii beno ke butuka!

<sup>136</sup> Ya kele na mwana yina me basika na kivumu ya mama ya yandi, ya kele na mutindu mosi ya luzingu. Ya kele luzingu, mpe mwa ba-cellule ya yandi. . . mwa ba-cellule na kati ya nzutu ya yandi ke ningana mpe ke bula mpe ke dumuka mutindu *yina*. Kasi ntangu ya kele ya kubutuka, ya kele. . . [Mpangi Branham me bula maboko ya yandi—Mu.] mutindu yina, mpe na manima yandi me boka, me kuma moyo ya moyo.

<sup>137</sup> Mpe bébé mosi lenda kwenda na yinzo-Nzambi mpe kutuba, “Oh, mu ke kwikila na yinzo-Nzambi. Mu, mu ke kwenda, mu ke sala *yayi*. Mpe mu kele mbote. . . mu zola kusala mbote, mu zola kusala kieleka.” Kasi yina yawu ke na yawu nsatu kele Nsangu ya mbote mpe kuvumbuka na mpongi, kuboka samu

na Luzingu ya Kukonda nsuka; mpe Mpeve-Santu ke boka na kati ya yawu, mutindu Yawu me boka ntete ve. Na yina ya kele kivangu ya malu-malu, ya me butuka na Mpeve. Na yina ya ke banda na kukula, ke tambula, mpe ke kuzwa bumuntu ya yandi kati na Nzambi; beno me mona, kaka mutindu bébé mosi, bébé na bumuntu, kele na bumuntu ya yandi na yinza.

<sup>138</sup> Na yina kana tabernacle ya ntoto yayi kubeba, beto kele na mosi yina ke na kuingila, beno me mona. Ya kieleka kaka mutindu nzutu ya kimuntu vwanaka basika, ya kele na nzutu ya kimpeve yina ke yamba yawu ntangu yandi ke basika na mama ya yandi. Mpe ntangu ya ke basika na mama, na ntoto, yina kele, ya kele na kati ya kivumu ya yawu ntangu yayi, ke na kuvumuna, ke na kuboka, (O Nzambi!), ke na kunionga, ke na kununa, mpe bimbevo, mpe bima nionso ke na kuniongisa yawu, mpe mpeve na kati ya yawu ke na kusosa yinsi yina kele na simu ya nzadi. Ya ke na kunionga, ke na kuningana, ke na kudumuka, (yinga, tata) samu ya ke na luzingu na kati kuna yina ke zinga kukonda nsuka. Ya kele na kati ya nzutu yina fwana kufwa. Mpe ntangu yankaka, kaka na ntangu mama basisaka nzutu ya bébé ya yandi, mpe nzutu ya kimpeve bakaka yawu; ntoto ke zimbana, mpe nzutu ya nsuni ke zimbana, mpe nzutu ya nsuni . . . to nzutu ya mazulu ke simba yawu kuna. Kana tabernacle ya ntoto yayi kubeba, beto kele na mosi yina ke na kuingila. Ya kele samu na yina beno ke zimbana bima ya yinza. Ya kele ya kufwa, samu na beno. Ya kele Mpeve.

Ntangu yayi beno tala yawu mbote mutindu beto ke kwenda na ntuala ntangu yayi, bampeve nyonso zole.

<sup>139</sup> Mpeve-Santu kele Lubutuku ya malu-malu, beto zaba yawu. Ya kele kubutuka mbala zole, na Mpeve ya Nzambi. Ya kele mutindu beno kele ya kubutuka, na nzila ya Mpeve. Ya kubutuka na nzila ya Mpeve, ya kele Lubutuku ya malu-malu. Mbote mingi. Beno kele ya kubutuka na Mpeve; kuna ntangu beno me butuka na Mpeve, beno kele ya kifuluka na Mpeve-Santu. Mbote mingi.

<sup>140</sup> Na yina ntangu zole yayi kele na ntoto, ya kimuntu mpe ya kimpeve, bantangu yankaka . . . Mu me monaka yayi. Ntangu yayi samu na kumanisa, mu zola kuma pene-pene ntangu yayi, samu na kutuba yayi na mwa ntangu fioti. Na mutindu ya kimuntu to na kati ya kimpeve, to mosi . . . Ntangu yayi mu ke na kivuvu ti muntu nionso ke simba yayi. Ntangu yayi beno vwanda kaka swi mpe beno vwanda na luzitu mutindu beno lenda.

<sup>141</sup> Ntangu yayi, beno me monaka ntete yayi? Beno ke mona na mabuundu ya beto bubu yayi, ata mpe na bimvuka sika wapi beto me kabwana mpe me sala ba organisation; mpe beto monaka nionso yayi. Mpe beno monaka muntu kubaka Disonuku mosi, mpe, mpangi-bakala, ti muntu lenda baka Masonuku yina mpe kusala ti yawu kuzinga ya malu-malu, kusala yawu kuzinga

kaka kieleka yina yawu silaka awa na kati ya Biblia. Mpe muntu yankaka ke mona yandi kusala yawu, mpe yandi ke kwiza mpe ke meka na kusala yawu, mpe ke kondwa. Mu banza ti beno ke tanga yawu ntangu yayi. Yandi ke kubwa. Samu na yinki? Masonuku me twadisama ve na kimpeve samu na yandi. Yandi ke na kumekaka kaka na kumekula. Yandi ke na kumekaka na kusala mutindu kima mosi. Yandi vwandaka ve. . . Mbote, mu banza ti ba fidisaka yandi na nzila ya muntu. Mu banza ti muntu mosi tubaka, “Mbote, nge lenda sala kima mutindu mosi.” Beno me mona, kaka mutindu Yesu tubaka ti ya ke vwanda mutindu yayi. Biblia ke zabisa yawu na ntwala na bilumbu ya nsuka, “Mutindu Jannès na Jambrès teleminaka Moïse.”

<sup>142</sup> Kuna telamaka Moïse, mpe kuna telamaka Jambrès. Mpe Moïse losaka nkawa ya yandi na ntoto, mpe ya kumaka nyoka. “Kasi,” Pharaon tubaka, “kwisa awa, Jambrès, nge lenda sala kima mutindu mosi.” Mpe yandi salaka yawu, beno me mona. Kasi yinki salamaka? Na manima nkawa ya Moïse me mina nkawa ya yandi. Beno me mona, yawu monisamaka pwelele. Wapi yinti ya yandi vwandaka?

<sup>143</sup> Kaka mutindu mbanzulu ya kulutila zulu. Ya kele mutindu mwa kitini ya bunganga yayi. Ya kele mutindu mabuundu yayi yina ba ke kwikilaka na nsuni, ntama mingi. Bima ya. . . Ba ke tuba, “Kasi, yina vwandaka samu na kilumbu yankaka.” Bawu nionso ke na nganda. Kasi beno tala mbote mpeve yayi na bilumbu ya nsuka ke mekula Mpeve ya kieleka. Beno me mona? Kele kisika yina mpasi ya beno ke kwisaka. Ya kieleka kaka mutindu mosi yina kele kieleka, beno me mona; kasi yandi lendaka ve kutalisa yawu, yandi lendaka ve kusimba yawu, yandi lendaka ve kusala ti yawu ke zingi mingi. O Nzambi!

<sup>144</sup> Bantu ke kwisa mpe ke tuba, “Mu me kuzwa Mpeve-Santu, mpe.” Beno tala mutindu ba ke zinga; ya ke zingi mingi ve na reveil mosi na yankaka, katuka lukutakanu mosi na yankaka. Ya me monisama, ba me kuzwa Yawu ve. Kana bakala mosi me butuka na Mpeve ya Nzambi, to kento mosi, bawu kele na bambuma ya Mpeve. Bawu ke tambula na busantu. Bawu ke zinga luzingu yina. Beno me mona? Bawu ke tina ntama na bima ya yinza. Nzambi ke kota na kati ya bawu mpe ke sala Yandi mosi kumonisama, mpe ke lakisa ti Yandi kele Nzambi yina ke na kusalaka na kati kuna. Yankaka ke mekula. Beno me mona?

<sup>145</sup> Bakumekula, yina vwandaka tii na nsuka, kumekula. Beno tala Ismaël, mpe Isaac; mpe bisika nionso, beno me mona, kumekula. Beno tala profete Moïse, mpe beno tala profete Balaam. Beno me mona? Beno me mona mutindu yawu kwendaka! Beno tala Judas, mpe beno tala Yesu.

<sup>146</sup> Mpe Yesu zabisaka na ntwala ti Mpeve-Santu yayi, na bilumbu ya nsuka, ke vwanda Kidimbu ya Nzambi. Ntangu yayi, yinki ke vwanda kidimbu ya kibulu? Ba ke losa Kidimbu



ya Nzambi. Na yina, bayina nionso vwanaka ve na Kidimbu ya Nzambi vwanaka na kidimbu ya kibulu. Mpe kana yawu kele bidimbu zole ya kimpeve, mosi na kati ya yawu ke vwanaka kidimbu ya kieleka ya Nzambi, yina yankaka ke manga lukwikilu. Beno lenda mona yawu?

147 Beno tala kidimbu na Ngwisani ya Ntama. Ntangu mpungi bulaka, jubilé, na bamvula mingi, bampika kumaka na kimpwanza samu mpungi yina bulaka. Mbote, muntu nionso yina zolaka vwanaka na kimpwanza, lenda kwenda. Kasi bayankaka na kati ya bawu, ba vwanaka zola kuvwanda bampika, na yina ba vwanaka nata bawu na autel mpe na dikunzi ya dibuundu, mpe ba vwanaka tobola dikutu ya bawu na poinceau. Mpe ba vwanaka tula bawu kidimbu, ba vwanaka sadila ntangu nionso mfumu yina.

148 Mpe bubu yayi beno ke kuwa Nsangu ya mbote samu na Kieleka, “Ntangu yayi beno lenda vwanaka na kimpwanza kana beno zola,” Nzambi ke tuba na beno. Kasi ntangu beno ke kuma na ndilulu yina awa mpe beno ke tala kuna, mpe beno me kuzwa luzabu ya Kieleka, na manima beno ke kwenda, ya ke yangisa beno na dikutu mpe beno ke vwanaka ntangu nionso mukwikidi ya kulunguka. Beno ke vwanaka musambidi mpe ke kwenda na yinzo-Nzambi, kasi beno ke kuzwa Mpeve-Santu ata mbala mosi ve. Beno me mona, na yina beno ke sadila yawu kilumbu ya beno nyonso. Ntangu yayi, kidimbu ya kibulu, to Kidimbu ya Nzambi. Mpe beto me kuma pene-pene mingi.

149 Ntangu yayi, beno tala, Ndinga fwana vwanaka yina me twadisama na kimpeve; kuwa Yawu, kundima Yawu, mpe kusala na nzila ya Yawu. Bantu mingi ke kuwa, kasi ke ndimaka Yawu ve.

Nzambi ke tuba, “Yayi kele ngunga samu na beno.”

150 “Mu ke vwanaka exalté ve. Mu—mu ke zola ve ata mosi ya Yawu.” Beno me mona, bawu ke ndima Yawu ve.

151 Beto ke kwenda na balukutakanu, Mpeve-Santu ya nene ke kulumuka. Mu vwanaka ya kuvwanda kuna kilumbu yankaka yina, ntangu vision mosi basikaka mpe tubaka na ntwala kieleka nionso yina. Mu tubaka, “Awa me kwisa ntwanya ya bakala.” “Kwisa awa,” yandi salaka kidimbu na kisadi yina, “nge ke na mpasi ya ntima mpe nge ke sosa . . .”

“Yinga. Ya kele kaka kieleka.”

152 “Beno me mona kento yina ke na kwisa kuna?” “Kwisa awa. Nge ke na kivimbu na dibeke, mpe ya kele na dibeke ya kikento, mpe nge ke na mpasi mingi. Mpe nge kele nsumuki mpe kele ve . . .”

“Ya kele kaka kieleka.”

153 Bantu yina vwanaka kuna, talaka na nziunga, balongi mpe bawu nionso, bawu tubaka, “uh-huh!” Beno kwenda na

lukutakanu, beno tala mbote Mpeve-Santu kuna na kati ya lukutakanu mpe ke tuba mansweki ya bantima, mambu ya mutindu yina. Beno ke tuba, “Mbote. Mu banza. Yinga.” Beno me mona? Oh, mpangi-bakala! Beno me mona? Ya—ya kele—ya kele na simu yankaka, ya kele na kima mosi me salama. Bakento ke landila kukwenda kaka na ntwala, ke sala kima mutindu mosi. Babakala ke vutuka kuna, mutindu ngulu na potopototo ya yandi mpe yimbwa na biluki ya yandi, kaka mutindu mosi. Beno ke mona ve? Ntangu yayi mu ke na kuzonzila na nsu- . . .

<sup>154</sup> Beno me mona, beno fwana bakula na yina, nkundi, wapi mutindu beno kele. Ya kele samu na yina bande yayi, mu tubaka, “Samu na dibuundu kaka.” Beno me mona? “Samu na dibuundu kaka.” Kana ba bokilaka beno na nsemo. . . katuka mudidi na Nsemo, katuka lufwa na Luzingu; na mutindu ya nganda, na mutindu ya mayele ya Klisto, samu na nzingulu yina me butuka mbala ya zole; mpe na kutalaka na luzingu ya beno, ti ya ke tula bima ya yinza na lweka, mpe beno ke telama samu na Klisto, ata nyonso; na yina kima mosi me salama. Beno me mona? Ya kele na kima mosi na kati ya beno, yina ke na nzala mpe ke na kusosa, mutindu ya vwandaka na Jacob. Beno me mona, beno ke na kunwana na Mfumu, beno ke tambula na mutindu ya luswaswanu na manima ya yina. Kima ya luswaswanu kele na kati ya beno, beno me soba.

<sup>155</sup> Ntangu yayi, yawu fwana, na ntwala yawu lendaka salama, yawu fwana twadisama na kimpeve samu na beno. Mu ke kipe ve, mu lendaka telama awa mpe kulonga tii mu ke kuzwa. . . bansuki yina me kuzwa me kubwa, tii mapeka ya munu ke kubwa mpe mu ke kuma na bamvula makumi yivwa, mpe beno ke kuwa bilumbu nionso; tii kuna Nzambi ke kindisa beno, beno ke vwanda kaka na kitezo ya mutindu mosi.

<sup>156</sup> Bilumbu zole mu vwandaka longuka mpe mu vwandaka sambila samu na yawu. Beno me mona? Mu tubaka, “Mfumu, mu lendaka tuba yawu na dibuundu?”

<sup>157</sup> Kima mosi tubaka, “Tuba yawu. Ngunga me kuma pene-pene. Tuba yawu.” Mu ke na kuwa ti Yandi ke benda munu ntama mingi ve, na yina mu—mu zola ti beno zaba yawu.

<sup>158</sup> “Muntu ve lenda kwiza na Munu,” tubaka Yesu, “kana Tata ya Munu kubenda yandi ntete. Oh, mu zaba ti beno ke tuba ti beno kele na Nzambi mpe Abraham, na tata ya beno; kasi mu ke tuba na beno yayi, beno kele. . . tata ya beno dyabulu,” tubaka Yesu. Bantu ya nsambulu, banganga-Nzambi, mpe bantu ya nene, “Beni kele ya dyabulu, tata ya beno.” Beno me mona? Beno tala, bambuma ya Kimpeve.

<sup>159</sup> Ntangu yayi, beno me mona, yawu fwana kindisa beno.

<sup>160</sup> Mu lendaka banza ve na yina Noé tubaka, “Beni zaba yinki? Ya fwana vwanda ti mvula ke noka kilumbu mosi, na yina mu ke kwenda kaka kuna mpe mu ke tunga nzaza. Kana yawu noka,

mbote, mu ke kota na nzaza mpe mu ke kwenda. Mpe kima mosi ve ke kwamisa munu, samu ti mu ke kota na nzaza mpe ke kwenda.” Beno lenda banza? Ve. Ve. Ya vwandaka yawu ve. Kana ya vwandaka yawu. . . Oh, bika ti Musolami kuwa yawu ntangu yayi. Kana ya zolaka vwanda yawu, museki ya ntete kwisaka, mutindu Biblia ke tuba ti ya vwandaka, sekaka yandi, yandi zolaka tulula nzundu ya yandi mpe kukwenda.

<sup>161</sup> Mutindu bantu ke salaka bubu yayi, yina ke banda na Yesu; mpe ntangu ba ke tala mpe ke mona Kieleka, ba ke kwenda ntama na Yawu. Ba lenda ndima Yawu ve.

<sup>162</sup> Mutindu evangeliste yina tubaka ve, “Ya ke—ya ke bebisa ministere ya munu.” Mu ke kipe ve ministere yina Mpeve-Santu ke bebisa. Ya fwana kubeba. Ntangu yayi, kasi, beno me mona, ya ke na lulendo, babakala mingi, bantu mingi. Oh, beno tala yayi ntangu yayi.

<sup>163</sup> Noé vwandaka kuna na kilanga, mpe yandi kuwaka, mpe yandi ndimaka, mpe yandi sadilaka. Ata lutangu ya bantu ya kuseka kwizaka, yandi tungaka kaka.

“Noé, nge kele exalté.”

<sup>164</sup> “Beno yangisa munu ve.” Landilaka na kutunga! Yandi kuwaka. Yandi ndimaka ti ya vwandaka Nzambi, yandi talaka yawu na nzila ya Masonuku, mpe ya vwandaka mutindu yina. Yandi tungaka kaka nzaza, kukondwa kukipe.

<sup>165</sup> Beno lenda banza, beno lenda banza yayi, ti Moise, ntangu yandi vwandaka kwenda na Egypte, basikaka kilumbu mosi mpe tubaka na Sephora, kento ya yandi, “Sephora, nge zaba yinki? Mu me lengula mwa grammairie ya munu. Mu kele na mwa ba-mathématique ya munu nyonso ya kusungika, mpe mwa géométrie mpe, oh, bima mingi yankaka, mpe malongi ya munu ya lukolo. Kubanda ntangu mu vwandaka keba mameme kuna, mu—mu—mu me lengula mwa ndambu ya yawu. Mu salaka kifu kuna na Egypte. Mu banza ti mu ke kwenda kuna mpe ke sungika yawu. Mu banza ti mu ke kulumuka kuna na nsi?” Ve, kitembo ya ntete kwisaka nwanisa yandi, yandi zolaka kubwa kuna.

<sup>166</sup> Yinki yandi salaka? Yandi zimbanaka nionso yina yandi zaba samu na géométrie mpe samu na kulonguka ya yandi. Ya vwandaka yandi yina kotaka na mpasi.

<sup>167</sup> Ya kele yina kele na dibuundu na kati ya mpasi bubu yayi, ya kele na milongi mingi ya kulongoka kukondwa kuvwanda ya Mpeve. Babakala mpe bakento ke zolaka kuwa banzonzolo ya bantu ya kulonguka, na kisika ya kulonga ngolo mpe mvumbukulu ya Yesu Klisto. Yawu yina beto ke na yawu na mpasi bubu yayi. Beto ke na nsatu diaka ve ya balukolo ya zulu mpe malongi ya balongi. Beto ke na nsatu ya bantu yina Nzambi me bokila yina me fuluka na Mpeve-Santu, mpe ve théologie yina muntu me sala ya denomination mosi. Beto ke na nsatu ya bantu yina Nzambi bokilaka.

<sup>168</sup> Moise vwandaka keba mameme, yina vwandaka mpe zimbanaka. Yandi zabaka ti bantu ya yandi ya mayele me kubwa. Yandi zabaka ndongosolo ya yandi kubwisaka yandi. Yandi vwandaka keba mameme, kasi yandi kuwaka, oh, “Katula basapatu ya nge, Moise, ntoto yina nge me telema kele santu.” Yandi waka yawu. Yinki yawu vwandaka? Ndinga ya Wanzio tubaka ti yawu vwandaka Masonuku. Yandi silaka Abraham, tata ya yandi, “Mu ke kwisa tala bantu na manima bawu me vwanda awa bamvula nkama yiya, mpe Mu ke basisa bawu na diboko ya ngolo.” Yandi ndimaka ti yina vwandaka Masonuku ya Nzambi yina me monisama.

<sup>169</sup> Bika mu telema fioti. Bika yayi kukota. Beno lenda mona yina mu ke tubila bubu yayi? Ndinga ya Nzambi me monisama pwelele na ntwala ya beno, mpe beno ke bakula yawu ve. Beno banza ntangu yayi na Sodome mpe Gomorrhe; beno banza na nsilulu ya Klisto samu na bilumbu ya nsuka.

<sup>170</sup> Moise ndimaka yawu; yawu vwandaka Masonuku, yawu vwandaka nsilulu. Yandi kuwaka, yandi ndimaka yawu. Kima mosi kwisaka na kati ya yandi, mpangi-bakala, yandi lenda kwenda sala yayi na ntangu yina. Yandi salaka. Yandi lendaka kulumuka mpe kusukisa konso Pharaon. Yandi lendaka bokila bampasi ntangu yandi zolaka sala yawu. Yandi lendaka zibula Nzadi Mbwaki, samu yandi kuwaka, yandi ndimaka, yandi vwandaka sala na kisika ya Nzambi.

“Mu ke vwanda Nzambi samu na nge, nge ke profete samu na Munu,” Yandi tubaka.

Mpe yandi tubaka, “Mu lenda sala yawu ve.”

<sup>171</sup> Yandi tubaka, “Mbote, na yina, nge ke vwanda nzambi, mpe Aaron ke vwanda profete ya nge. Nge fwana kwenda, na mutindu nionso.”

<sup>172</sup> Yandi tubaka ata fioti ve, “Mbote, mu banza ti mu lendaka kwenda kuna samu na kusungika bima.”

<sup>173</sup> Beno lenda banza Élie na Mongo Carmel, tubaka, “Beno zaba, yinsi yayi kele ya kifuluka na disumu, mu banza, mu banza ti mu fwana kwenda kuna mpe kutuba na Achab ti yandi fwana vwanda na nsoni ya yandi mosi. Mu banza ti mu lendaka mata na mongo kuna mpe kuvwanda, mpe kaka na nswalu ntama mingi, ti bantu yayi ke kuma mingi bambevo mpe ya kulemba na kutala munu kuna na zulu na nsatu pene ya kufwa”? Ve. Ve. Ya vwandaka mutindu yina ve.

<sup>174</sup> Kasi yandi kuwaka, mpe yandi ndimaka, mpe yandi sadilaka. “Mu me tuba na bangoy-ngoy na kupesa nge madia. Mata kuna, na Keriti.”

<sup>175</sup> Ntangu ya kumaka ntangu ya kumekama na kati-kati ya Baal mpe Nzambi, yandi tubaka, “Kwenda, nata minkayulu ya nge, sala nyonso yina nge zola, mpe beno bokila nzambi ya

beno.” Ntangu ba kukizengaka bawu mosi, mpe ba vwandaka na bansuni mingi, mpe ba vwandaka dumuka na zulu mpe na ntoto, ba vwandaka sala makelele mingi, yandi tubaka, “Beno sala mwa makelele mingi, mu banza ti yandi me kwenda, kutambula na kisika mosi kuna. Yandi lenda vwanda ya kulala.” Oh, mpangi-bakala!

176 “Mbote, nge zaba yinki?” Yandi tubaka, “Mu ke mukwikidi ya Yehowa, na yina mu lenda sala yayi, na mutindu nionso.” Oh, ve, beno mekula yawu ve. Ve. Beno meka ve kuvwanda Elie tii kuna Nzambi ke bokila beno na kuvwanda mutindu yina. Yinga, tata. “Mu kele kasidi ya Yehowa.” Ya kele na bankama sambwadi ya bawu na yisi kuna, diaka, kasi ata mosi ve na kati ya bawu me meka na kusala yawu.

177 Na yina ntangu yandi zengaka ngombe ya bakala mpe yandi losaka masa na zulu ya yawu, yandi tubaka, “Mfumu, mu me sala yayi na lutumu ya Nge.” Beno me mona . . . Bawu nionso yankaka me meka, ya me vwanda ya muvimba ya kubwa.

178 Ya fwana twadisama na kimpeve na beno! Mpeve-Santu fwana nata yawu mpe kutalisa yawu na beno.

179 Yawu yina diambu bubu yayi. Beno lenda telama ve, na autel, mpe kutuba, “Mbote, Alleluia, Alleluia. Mfumu, mu zola Mpeve-Santu. Alleluia, Alleluia.” Ve.

180 Kasi, mpangi-bakala, mpangi-kento, ntangu Mpeve-Santu me twadisa Ndinga yina na nge, beno ke kuzwa Yawu ntete beno katuka na kiti ya beno. Kima mosi na kati ya beno me yokama. Mulongi ke tuba na beno ve kusala *yayi* mpe kusala *yina*. Matiti ya ntama ke katuka kaka, mpe matiti ya malu-malu ke kwiza na zulu ya yawu. Ya me twadisama na kimpeve na beno. Beno ke dasukila ve mulongi ntangu yandi ke longi Kieleka ya Biblia. Beno ke zola Yawu, beno simba Yawu. Ya kele Madya samu na moyo ya beno.

181 Mpe Yesu, Yandi mosi, Yandi tubaka, “Mu ke salaka ve yina mu zola kusala, na kati ya Munu mosi. Mwana lenda sala kima mosi ve kasi yina Yandi ke mona Tata ke sala.” Bandinga . . . Yandi vwandaka Emmanuel, Yandi mosi. Yandi vwandaka Nzambi na zulu ya ntoto; Yesu vwandaka. Yandi vwandaka nzutu yina Nzambi zingaka. Yandi vwandaka tenta yina Nzambi vwandaka zinga na nsi ya yawu. Amen. Kasi na kati ya nionso yina, Mwana ya Nzambi yina me butuka na mwense, Emmanuel na muvimba ya Mpeve, Yandi vwandaka na Mpeve kukondwa kitezo. Mpe, kasi, na nzutu ya Yandi Mosi, Yandi tubaka, “Mu ke sala kima mosi ve tii kuna Tata ke lakisa Munu ntete.” Yina me twadisama na kimpeve samu na Yandi, samu na kusala yawu!

182 Satana tubaka, “Soba matadi yayi na dimpa, mpe sala kimangu. Bika mu mona Nge kusala yawu.”

183 Yandi tubaka, “Ya me sonama, ‘Muntu ke zinga kaka na dimpa ve.’” Oh, la la! Kasi ntangu nkonga ya bantu vwandaka na nzala, Yandi bakaka mampa tanu mpe mwa bambisi zole, mpe disaka mafunda tanu ya bantu. Oh, Alleluia! Beno me mona yina mu zola kutuba?

184 Beno meka ve na kumekula. Yawu yina diambu ya Pentecote bubu yayi. Yawu yina diambu na dibuundu bubu yayi, bantu mingi ke meka na kumekula ti bawu kele na Mpeve-Santu. Bantu mingi ke meka na kumekula kubeluka ya Kinzambi. Bantu mingi ke meka na kumekula bima ya luswaswanu ya Mfumu. Beno lenda sala yawu ve. Bima yina ke kwisaka na nzila ya nsodolo, Nzambi ke bokila, beno me basika na kivumu ya mama na yawu. “Makabu mpe balubokilu ba ke sobaka yawu ve.” Oh, la la! Ya kieleka. Beno lenda ve kuvwanda kima mosi beno kele ve.

185 Kasi kana Nzambi me bokila beno, beno vutula mingi matondo na yinza samu ti Yandi me bokila beno. Na yina ya me kuma kieleka samu na beno.

186 Mutindu mu ke tuba, kana mu vwandaka na ntangu, samu na bampadi kilumbu yina, yina me vutula munu. Mu me monaka yawu ntete ve, mpe mu lendaka sala yawu ve. Hattie, yina me vwanda kuna ke tala munu. Wapi mutindu yina lendaka salama? Yawu lendaka sala yawu ve, kasi yawu vwandaka ya kutwadisama na kimpeve, me kindisama. Ndinga me tubama mpe yawu salamaka mutindu yina. Alleluia!

187 Paul, beno lenda banza yandi kutuba, “Mu me basika na mubu yayi bilumbu kumi na yiya mpe bampimpa kumi na yiya, mpe ata bambwetete to ngonda ve, to kima mosi ve. Mu banza ti mu ke mata kuna mpe ke tuba na bawu, ‘Beni vwanda na kikesa, samu ti Nzambi ke keba beto, na mutindu nyonso’?” Oh, Nzambi ke salaka ve mutindu yina. Nzambi ke salaka yawu ve.

188 Lukwikilu ya nge kele mbote, mpangi-bakala. Lukwikilu ya nge kele mbote mingi. Kasi tii kima ke twadisama na kimpeve na beno!

189 Oh, awa kele nsemo ya mbwaki na zulu kuna, mpe kana mu mona. . . Mu ke tuba, “Mbote, mu me tula dikulu ya munu na zulu ya accelerateur. Mu ke na ditoma mosi. Mu lenda luta na mwinda yina kuna, samu na kusala ba-kilometre nkama mosi na makumi yivwa na tatu na ngunga mosi.” Ya kele kieleka. “Mu lenda kuwa ngolo na nsi ya dikulu ya munu.” Kasi beno fwana vingila tii beno ke kuzwa “kwenda” mutindu kidimbu. Alleluia!

190 Beno me bakula yina mu zola kutuba? [Dibuundu me tuba, “Amen.”—Mu.] Ntangu kidimbu *kwenda* ke kwisa, mbote mingi. Ntangu kima me twadisama na kimpeve na beno, mpe Nzambi ke zabisa yawu mutindu Yandi salaka na ntangu yina kuna, mbote mingi. Kasi tii kuna Yandi ke sala yawu, beto kele na nkonga ya bantu ya ba-Judas bayina ke na kumekula, ke tambula kuna

mutindu, ke tuba, “Mbote, mu ke kaka mutindu bawu kele. Mu kele Muklisto, mpe.”

<sup>191</sup> Oh, beno ke bambuka moyo ve? Bana ya babakala ya Scéva, basikaka kuna mpe tubaka, “Beto ke tuma nge, beto ke tuma nge na Nkumbu ya Yesu yina Paul ke longaka. Basika!”

Yandi tubaka, “Mu zaba Paul, mpe Yesu mu zaba, kasi nani beno kele?”

<sup>192</sup> Ngunga ke kwisa ntangu mbote mpe yimbi ke monisama. Ya ke talisama na Baklisto bubu yayi. Ya ke talisama na kati ya mabuundu bubu yayi. Ya ke talisama na kati ya bantu bubu yayi. Mu ke na kusimba beno ntangu ya yinda; mu zola ti yayi kukuma na beno.

<sup>193</sup> Paul tubaka ata mbala mosi ve, “Mu banza ti mu ke kwenda kuna mpe mu ke tuba, ‘Mbote, beno vwanda na kikesa.’” Ve.

<sup>194</sup> Yinki yandi salaka? Yandi kuwaka Wanzio mosi. Yandi zabaka ti yina vwandaka Wanzio mosi yina vwandaka tuba na yandi ntangu nionso. Yandi ndimaka, na manima yandi salaka. Yandi kwendaka kuna mpe tubaka, “Beni vwanda na kikesa. Samu ti Wanzio ya Mfumu, Yina mu kele kisadi, yina telamaka pene-pene ya munu mazono na nkokila, na kulakisaka munu vision ti ya ke vwanda ve na kima yina ke zimbana, na masuwa yayi. Beni vwanda na kikesa ya mbote. Beni kwenda kudya madya ya beni ya midi ntangu yayi. Nionso kele mbote.” Amen. Na ntangu yawu me twadisama na kimpeve na beni, na ntangu Nzambi me kumisa yawu kieleka!

<sup>195</sup> Mu ke na mulabu mosi awa kisika mosi kuna, mu sonikaka. Yawu yayi awa. Uh-huh. Beto me kuma na nsuka ya bima nionso. Bika mu nata yawu na mutindu yayi na ntangu yayi, samu na kumanisa. Mu banza ti Nzambi me monikisa kima mosi na beni. Beni tala. Nyonso me kuma na nsuka. Muntu mosi yufulaka na nkokila yina, mu banza ti ya vwandaka Mpangi Fred Sothmann, beto vwanda yufula wapi mutindu ntangu me kuma na nsuka.

<sup>196</sup> Mpangi Demos Shakarian me monaka vision yina pwelele, mpe ya me salama bilumbu tatu na manima, na mutindu ya kulunga, yawu monanaka ti yandi kubwaka na basapatu ya yandi. Yandi bokilaka munu. Yandi tubaka, “Wapi mutindu Joseph kele?”

Mu tubaka, “Mbote mingi.”

Yandi tubaka, “Yandi ke mona ba-vision?”

<sup>197</sup> Mu tubaka, “Yinga. Yandi tubaka samu na David, mwana ya bakala ya Mpangi Wood, kisika yandi kubwaka na zulu ya velo, bilumbu tatu to yiya na ntwala yawu salama, kaka na mutindu ya kulunga.”

Yandi tubaka, “Nge zaba, mambu yina ke landaka mabuta.”

198 Mu tubaka, “Mbote to yimbi, na yina, to mosi na yankaka. Yawu ke landaka mabuta.”

199 Mpe beto vwandaka solula mwa fioti, mpe bawu, Fred tubaka na munu, “Wapi kisika ba ke baka yawu, Mpangi Branham?”

200 Mu tubaka, “Tala, Fred, beto baka yawu na yinza. Nzambi ke salaka na kati ya yinza ya Yandi. Beno tala, beno tala yina salamaka. Mwini ke basikaka na Este. Yina kele civilisation ya kulutila ntama yina beto me kuzwa, kele Chine.” Beto nionso me zaba yawu.

201 Civilisation ya kulutila ntama beto me kuzwa kele Chine. Mbote mingi. Mpe civilisation me luta na lweka ya weste bisika nionso kuna. Mpe ntangu yayi wapi kisika beno ke katuka kana beno me bika Côte Ouest, kuluta kuna? Beno kwenda na Chine. Ya kieleka. Beto me kuma na nsuka. Biblia me tuba, profete me tuba, “Ya ke vwanda na kilumbu mosi yina ya ke vwanda ve kilumbu, ntangu mwini ke luta, kasi na ntangu ya nkokila,” kaka ntete yawu kusuka awa, “dyaka ya ke vwanda na Nsemo, mutindu mosi.” Yesu tubaka, “Ya ke vwanda na mvula ya ntete mpe mvula ya nsuka. Mpe mvula ya nsuka ke basisa nionso zole mvula ya ntete mpe mvula ya nsuka, na nsungi mosi.” Beto me kuma na ntangu ya nsuka.

202 Beno tala awa, bika mu lakisa beno. Politiki kele na nsuka. Beno ke kwikila yawu? Beno talisa munu kima mosi bubu yayi. . .

Yinsi yayi kele ya kulutila yimbi na yinza, samu na kubeba, kukondwa busantu. Nani tangaka zulunale Courier Journal na nkokila yina, na Louisville, ntangu bakento yayi nionso, vwandaka sola, na konso yinsi, kento ya kulutila kitoko na kati ya yinsi, mpe ba ke zangula bawu samu na kuvwanda Miss ya Yinza? Bantu nionso salaka kasi Russie ve. Mpe ba me tinda bantu na Khrushchev mpe me yufula yandi, “Samu na yinki ve?” Yandi tubaka, “Russie ke katulaka bilele ve na bakento ya bawu, samu na kutambula na ntwala ya babakala.” Yinsi ya mimpani, yinsi ya kukondwa busantu ke nata nsoni na beto yina ke bokila beto mosi Baklisto, yandi tubaka, “Russie ke katulaka bilele ve na bakento ya bawu, samu na kutambula mutindu yina. Mpe beno ke monaka ve bakupé to kima ya mutindu yina na Russie.” Ya kele kukondwa busantu. Mpe beto ke kukibokilaka beto mosi “Baklisto!”

203 Kukondwa ntembe ti Biblia ke tuba, “Bamesa nyonso me fuluka na biluki. Mpe nani mu lenda longa Malongi, mpe nani ba me katula na mabene? Kasi musiku ke kwiza na manima ya musiku, mpe nzila na zulu ya nzila. Samu ti na bikoba yina ke tekita mpe bandinga yankaka Mu ke zonza na bantu yayi. Mpe yayi kele Kupema. Samu na nionso yayi, bawu zolaka kuwa ve.” Beto kele na dibanza ya beto mosi ya lukolo. Oh, wapi mutindu



mbote ya lendaka vwanda samu na kubikana na zulu ya Yawu kilumbu ya muvimba.

<sup>204</sup> Politiki, ya kubeba! Ba-Démocrate, ba-Républicain, mpe bawu nionso, kele ya kubwa na nsi. Yinki ya kele? Ya kele nkonga ya bima ya kunamika. Muntu nionso ke sala na kati ya yawu, yina me butuka ve mbala zole, kele ya diabulu. Diabulu tubaka, “Bimfumu nionso na yinza kele ya munu,” mpe Yesu tulaka ntembe ata fioti ve na yandi. Yinza me twadisama na diabulu. Mpe konso muntu yina ke salaka kisalu ya luyalu, kana yandi kele Muklisto ve, yandi kele ya diabulu mpe ke sala samu na diabulu. Bayinsi yayi nionso ke kubwa na ntuala ya Yesu Klisto ntangu Yandi ke kwisa, ya ke vwanda na Millenium.

<sup>205</sup> Beno tala awa bubu yayi, yina bawu ke na kukwendaka na ntangu yayi. Ba ke na kunganina munu samu mu ke basisa mbongo mingi kuna samu na Baklisto, mpe ba zolaka kupesa munu kitumbu ya bamvula makumi zole na boloko, samu na kusadila mbongo na kisalu ya mouvement ya nsambululu mosi. Mpe whisky mpe bierre mpe makaya ke basisaka bamakumi ya mafuku ya ba-dollars na mvula mosi, samu na kufuta kaniaka na yinsi. Mpe mu vwandaka meka na kulonga ludedomo, mu vwandaka ya kutelama na kielo ya Yesu Klisto, mpe fidisaka munu na boloko samu na yawu. Mpe kubaka bima mutindu yina na yimbi, ya nsi mingi, ya mayele, ya ngangu, mpe kubika bawu kubasisa yawu samu na manaka ya television yina me bebisa yinza, yina me fidisa bakento na bayimbwa. Mosi ya bansingulu ya kulutula nene yina yinsi me kuzwaka ntete ve, mpe bawu ke kangama na yawu. Bawu ke tinda munu na boloko samu na kulonga Nsangu ya mbote, samu na kubaka mwa ba-dollars awa samu—samu na kulonga Nsangu ya mbote, yina bantu ke pesa munu samu na kulonga Nsangu ya mbote. Mu kele ve mvwama mpe mu lenda ve kusonika yawu. Kasi na yina bawu zola tinda munu na boloko, kusimba munu bamvula zole, mpe mu me kuzwa kumekama yina ke kwisa ntama ve. Oh, ya nsi mingi, ya mvindu! Nzambi, vwanda na kyadi.

<sup>206</sup> Mu ke tuba kima yayi, mu banza ya kele mutindu Nzambi kele na yawu na ntuala Yandi tinda bombe atomique. Beno fwana sala kima ya yimbi, beno zaba. Beno fwana simba mpakulami ya Yandi na ntangu mosi, samu na Masonuku mosi yayi, na yina ti. . . “Beno simba ve Musolami ya Munu.” Ya kieleka. Na yina kana ya fwana nata lufundusu, mutindu ya salaka na bilumbu ya Daniel to kisika yankaka, bika yawu kwisa. Mu kele kisadi ya Nge, Mfumu. Ya kele kieleka. Oh, yinga.

<sup>207</sup> Polititiki, na nsi mingi! Yinsi, ya kubeba! Mbote, beno tala yina! Bawu ke lwatisa basoda bakupé ntangu yayi. Oh, la la! Politiki, mvita! Politiki kele na nsuka. Bamfumu ya nkú kele na yimbi. Politiki kele luvunu. Samu na yinki bawu me vwanda ve na ntinu ya santu mutindu Nzambi pesaka bawu, David? Mfumu ya nene ya Angleterre tubaka, ntangu bayayi—ntangu

ba salaka democratie yayi, yandi tubaka, “Ya kele mbote mingi ntangu yayi, kasi ya ke kwiza ntangu mosi,” yandi tubaka, “ya ke vwanda kima mosi ve. Ya ke vwanda nyonso ya bavwale mpe ya kukondwa kizundu.” Mpe yandi kele kieleka. Yandi tubaka, “Bantu ya Politiki ke telemaka na bivinga ya ba-savon na konso nsongi, bima ya kutengama mutindu yina ke bebisaka luyalu.” Mpe bakala yango vwandaka ya kusungama. Kieleka yawu yina ke na kusalama.

<sup>208</sup> Bakala mosi lenda basika awa, mpe kubasika awa mpe kukola malafu, mpe kupanza nyonso yina yandi zola; mpe ke kulumuka kuna, yandi zaba bantu nionso, na yina kima mosi ve ba ke tuba. Bika ti bakala yayi ya mputu, to muntu mosi yina zaba kima mosi ve, kumeka kusala yawu, mpe ba ke tinda bawu na boloko. Kubeba, na nsi mingi, ya mvindu, makumi yiya na zulu ya nkama mosi na kati ya bawu kele ba-homosexual. Beno banza yawu, Sodome mpe Gomorrhe diaka! Ya kele na nkonga, yina fwana vwanda musambidi.

<sup>209</sup> Mu—mu ke kukiyufula yina ke salama na ntwala, ntangu Ntwadisi ya yinsi yina ke kwisa? Nzambi me pesa beto muntu mosi ya mbote ya busantu, Dwight Eisenhower. Mpe ntangu yayi mu me kuma- . . . Beno tala mbote yina kima ya kulanda ke kwisa. Mpe beto fwana vwanda na mpuku na ntangu ke kwisa, ya kele kaka kieleka. Kasi ya ke na kwisa, “Pharaon yina me zaba Joseph ve.” Beno bambuka moyo na yawu. Mu ke tubila yawu kaka na sekonde mosi. Politiki kele ya kubeba. Beto zaba yawu.

<sup>210</sup> Mvita kele na nsuka ya yawu. Oh, bawu vwandaka losa matadi mosi na yankaka na ntangu mosi, vwandaka bulana mosi na yankaka na yintu na masoka ya matadi, na manima ba vwandaka bula madingona mpe matolotolo. Na yina ba kele na minduki, na manima ba-masini ya minduki, na manima makumi nana na nana na Allemagne, mpe beto me kuzwa minduki ya nene. Na manima ba vwandaka losa ba-grenade na maboko mpe mupepe ya ndikila. Kasi ba me kuzwa bombe ya hydrogène ntangu yayi. Mvita me kuma na nsuka. Konso yinsi kele na yawu, na yina yinki beno ke sala ntangu yayi? Ata mpe mwa yinsi ya fioti bubu yayi, ke bweta kaka na buto mosi, yawu yina kaka ba fwana sala, mpe ya ke matisa nionso. Mvita kele na nsuka. Huh! Amen. Mvita kele na nsuka. Politiki kele na nsuka.

<sup>211</sup> Malongi kele na nsuka. Bubandi ya bana kele na nsuka. Bana, ya ke na kivuvu ve samu na bana, ba me kuma bilawu. Beno lenda ve kuzwa malongi. Beno lenda ve kukwenda na yisi awa na lukolo mpe kuzwa, kuzwa mwana na malongi. Yandi kele—yandi kele mwana ya difelo mbala ya zole kulutila yina yandi vwandaka ntangu yandi kotaka. Bika mulongi kutuba kima samu na yawu, yandi ke kufwa. Ba ke sala mwa Klux mpe ke basika kuna mpe ke bula masasi na mulongi, ke basisa yandi mpe ke kanga yandi. Beto me zimbisaka mafunda zole ya milongi. Oh, vingila fyoti, mu banza ti ya vwandaka makumi zole

ya mafunda ya milongi, na mvula yayi me luta. Mu ke semba yawu ve. Mu zolaka ve kusala yawu, mosi to yankaka. Ntangu yayi ba ke na bidimbu na zulu konso ntangu, “Beno pesa malongi ya lukolo ya bambuta na bana yayi.” Ba ke na nsatu ya yawu, kasi diabulu ke na yawu. Diabulu ke na yawu. Mpe ya kele kaka ve ya kulunga na kubasika mpe kuvwanda ya yimbi mpe—mpe—mpe kukatula mwelo mpe kunamika yawu kuna na yinti na mpimpa ya Halloween, to kusala mwa bima ya yimbi mutindu bana ya fioti ke salaka, to kubaka mwa pusu ya fermier mpe kutula yawu kuna na bala-bala, mutindu yina ve; kasi bawu kele bilawu. Bawu ke sala bima yina kele bulawu; ke bula beno masasi, ke kufwa beno, ke kufwa beno na munduki, ke pesa beno ndikila, bima nionso. Yina ke nsungi yina ke na kwisa.

<sup>212</sup> Kubuta me kuma na nsuka, bukento, bumama. Oh, ba ke sadila kima yina ke pekisa kubuta, mpe mwa bayimbwa me baka kisika.

<sup>213</sup> Bumuntu, nkadulu ya buzitu kele dyaka ve na yawu. Bakento, ke lwata bilele ya yimbi; ke kwisa na television, mitindu nionso ya bakumekula ya bantu ya yimbi ya Hollywood, bima ya mutindu na mutindu, bamvwatu. Nionso me kuma na nsuka!

<sup>214</sup> Malongi kele na nsuka. Politiki me kuma na nsuka. Mvita kele na nsuka. Civilisation kele na nsuka. Bima yina nionso kele na nsuka. Oh, la la, yinki beto lenda sala na ntangu yina? Yinki ke landa? Beto me kuma na nsuka ya bima nionso.

<sup>215</sup> Ntangu yayi luzingu ya dibuundu kele na nsuka, dibuundu ya mbote, ya dibuundu. Ntangu yayi, yayi lendaka sala mpasi fyoti, kasi dibuundu ya nsuni, dibuundu ya Ésaü, ya me kuma na nsuka ya yandi. Yinki yandi ke na kusala? Ya ke na kukwenda na kimvuka ya mabuundu, yina ke vukana na Romanisme, samu na kunwana na Catholique . . . to na malongi ya Catholique samu na kunwanisa communisme. Pape Jean ke na kubokila mabuundu nionso na kuvutuka, mpe ba ke sala yawu. Mpe bawu ke vukana bawu mosi kintwadi, kaka kieleka MUTINDU ME TUBA MFUMU.

<sup>216</sup> Beno ke tuba, “Vingila fyoti, Mpangi Branham. Nge ke na kubasika na nzila.” Kana mu kele, Nzambi sonikaka Biblia ya Yandi na nganda ya nzila. Beno fwana vwanda Michée, na dyambu yayi.

<sup>217</sup> Morris Cerullo tubaka na munu na nkokila yankaka, yandi tubaka, “Wapi mbeni ya Klisto, Mpangi Branham? Juif kele mbeni ya Klisto.”

Mu tubaka, “Morris! Mpe nge, kele Juif?”

Yandi tubaka, “Ba kele bayini ya kulutila nene ya Nzambi.”

218 Mu tubaka, “Morris, ve! Tuba na munu na Masonuku kisika mbeni ya Klisto ke basika na Jérusalem. Mbeni ya Klisto ke basika na Rome, na Palestine ve.”

Yandi tubaka, “Mbote, tala, mu kele. . . Bawu kele bayini ya Nzambi.”

219 “Yinga, Nzambi tubaka ve ti Yandi kufwaka meso ya bawu samu ti beto kuzwa kilumbu ya kumona? Kasi kilumbu ya beto ke suka ntama mingi ve.”

220 Yandi tubaka, “Oh, Mpangi Branham, mu me banzaka yawu ata fioti ve.” Beno me mona, yawu yina.

221 Beno me mona, beto kele na nsuka. Yinza ya nsuni, dibuundu ya nsuni me kuma na yawu, na nsuka. Beno tala mbote mutindu ya ke na kukwenda na kati ya kimvuka ya mabuundu. Ba-Freres Unis kotaka na bawu. Ba-Pentecotiste kele na kati na bawu. Bawu nionso me sala organisation. Beno tala beno kuna, ba-Cananéen, kubanda kuna tii na bampeve yina ya Ésaü, musambidi ya kieleka, mpe me vukana bawu mosi na yinza; ve lubakusu ya kimpeve, na lenda ve ya kununga, ve yina ba me soola na Nzambi, samu na kubokila yandi na kubasika mpe kukabwana.

222 Oh, kana mu lendaka zabisa yawu kaka, ntangu kana mu lendaka talisa yawu na mutindu nionso! Bawu ke mona yawu ve. Ba ke na meso mpe ba lenda mona ve, ba ke na makutu mpe ba lenda ve kuwa. Oh, samu na yinki beto me kuma ya kulemba mingi kati na Mpeve? Ntangu yayi, beno kuwa yayi. Nyonso kele na nsuka.

223 Mpe Dibuundu ya kimpeve kele na nsuka ya Yandi. Yandi me kuma na nsuka. O Nzambi! Beno tala na manima kuna ntangu Yandi bandaka na Luther, ya me ningana, na kimpeve. Na manima na Wesley, kwisaka na kusantisama. Na manima na Pentecote, Mpeve-Santu. Mpe ntangu yayi na ntangu ya nsuka, Mpeve ya Klisto ke mutindu mosi na kati ya Dibuundu, Yawu ke sala bisalu ya mutindu mosi yina Yandi salaka, kaka kuna na Yintu ya Yandi diaka; ya kukubama samu na Dibuundu mpe Klisto samu na kuvukana, mpe Nkwizulu ya Mfumu Yesu, mpe mvumbukulu ya bantu ya kufwa. Beto me kuma na ntangu ya nsuka. Yesu tubaka mutindu yina, “Mutindu yawu vwandaka na bilumbu ya Sodome, mutindu mosi yawu ke vwanda na nkwizulu ya Mwana ya muntu.” Beno me bakula yawu?

224 Beno tala dibuundu ya nsuni. Beno tala kisika ba ke kwenda, ntama mpe ntama.

225 Beno tala Dibuundu yina me fuluka na Mpeve, ke ningana babuzoba ya Yawu nyonso, kwisaka na Mpeve, (na mwa nkonga ya fioti, ya kieleka), kwisaka na Mpeve, kasi ke kota na kisika yina tii kuna Yawu ke kuma kuna na kisika yina Mpeve-Santu ke luta na kati ya Yawu, na kusalaka nzila ya Yandi, ya kukubama

samu na kuyamba Mfumu ya yandi, ya kukubama samu na kuyamba Mfumu ya yandi.

<sup>226</sup> Mpe bayankaka na kati ya bawu me sala organisation, ke vutuka na yinza, me kabwana, ke vutuka na kimvuka, ke kwenda kuna na kimvuka yina ya nene me twadisama na malongi ya Catholique. “Mpe ya vwandaka na kifwanisu yina ba me sala na mutindu ya kibulu.” *Kifwanisu*, “kima mosi mutindu yina.” Kimvuka ya nene ya mabuundu me sala na malongi ya Catholique, bawu zole kintwadi, ke sala kintwadi. “Nani kele na kiyeka ya kusala mvita na kibulu to kifwanisu ya yandi?” Ya kieleka ve. Wapi mutindu beto lenda tubila yawu na bangunga!

<sup>227</sup> Ntangu yayi bika mu tuba yawu na beno, mpe na manima ya ke vwanda ntangu ya kusukisa. Ya kele mu. . . Mu tubaka na beno ti ya ke vwanda ntangu ya yinda. Mu—mu ke na kiadi mingi. Ntangu Nzambi tubaka mambu yayi, tubaka, “Tuba na bawu. Tuba yawu. Kuvwanda dyaka ve swi. Lakisa Yawu na bawu. Kana bawu yamba Yawu ve, na yina menga kele ve na zulu ya maboko ya nge.” Ngunga me kuma na nsuka. Ntangu, yawu nyonso me kuma na nsuka.

<sup>228</sup> Yinza kele na nsuka ya yawu. Yawu lenda telema diaka ve. Bamvita kele na nsuka ya yawu. Beno lenda vwanda diaka ve na mvita. Kana beno ke na bamvita, ya ke vwanda diaka ve; kaka ntete muntu mosi ke benda mwa buto mosi, yawu yina. Politiki, kele ya kupola mpe ya kubeba.

<sup>229</sup> Dibuundu yinza kele Methodiste, Baptiste, Presbyterien, Pentecote. “Ya kele bangulu ke vutuka na poto-poto ya yawu, bayimbwa ke vutuka na biluki ya yawu.” Ya kele kieleka, mosi na mosi ya bawu! Nzambi ke bokila, na kubasika na kubeba yina, Dibuundu yina ba soolaka. Ya kele kaka kieleka. Ésaü, ba tubaka, “Beto kele dibuundu!” Mu ke na kusalaka ntembe na yawu ve. Jacob vwandaka tata ya Ésaü, mpe, ya kele kieleka, na yina, kasi—kasi. . . Mu zola kutuba, Isaac vwandaka tata ya Ésaü, mpe Jacob vwandaka mpangi ya yandi ya bakala, na yandi. Kasi mosi kuzwaka ndandu ya bukuluntu; yina yankaka yinaka yawu. Mosi kuwaka, ndimaka, mpe sadilaka. Yankaka yina tubaka, “Oh, ntangu nionso mu ke kwendaka na yinzoz-Nzambi mpe ke sala yina kele mbote, wapi luswaswanu ya ke sala?” Beno bawu yayi. Ntangu yayi na. . .

<sup>230</sup> Mu ke tuba yayi na yina, samu na kumanisa, mulabu yayi diaka. Dibuundu ya kieleka kele na mingi ya kuzinga ntangu yayi. Oh, ya lendaka vwanda ntangu mosi ya jubiléé samu na Dibuundu ya kieleka, samu na Dibuundu ya kieleka, samu na Dibuundu yina me soolamaka, ntangu beno zaba na kati ya ntima ya beno beno me luta lufwa na Luzingu; ntangu beno ke tala beno mosi mpe beno ke mona, beno ke tala mbote luzingu ya beno mpe beno ke mona ti bima nionso ya yinza me luta, ti beno me kuma kivangu ya malu-malu. Beno kuwa ntangu yayi,

samu na kumanisa, beno kuwa mbote. Beno zaba ti beno me luta, luzingu ya beno ke lakisa yawu, “Na nzila ya bambuma ya bawu beno ke zaba bawu.” Lukanu ya beno ya muvimba kele Klisto. Beno ke vingila Yandi kwisa na konso ntangu yina. Beno ke tambula na Mpeve. Beno zola Yandi. Beno ke mona Yandi kusala na nzila ya beno. Kima ve yina beno ke zola kusala, kasi Yandi ke sala yawu, Yandi mosi. Oh, yinki ntangu yayi!

<sup>231</sup> Ya ke bambuka munu artiste yina kwendaka kuna na Rome, samu na kulonguka na kuvwanda artiste, mwana-bakala ya ntwenia. Ba vwandaka tala yandi. Yandi vwandaka mingi ya kuswaswana na bana-babakala nionso ya Amérique mpe bana-bakento, mpe bima yina kwendaka kuna samu na kuvwanda ba-artiste, mpe na yinza ya muvimba. Ntwenya ya bakala yayi vwandaka ya kuswaswana. Yandi vwandaka muntu mosi ya mbote, mpe bawu vwandaka tala yandi. Bawu ke vwanda na bafeti ya nene, mpe ke vwanda na yisi kuna mpe, mutindu bawu ke salaka na Rome, ke vwanda kaka ya kulawuka malafu mutindu bawu lenda vwanda.

<sup>232</sup> Mu vwandaka kuna, munu mosi, mpe mu monaka bawu. Beno basika na bala-bala, babakala mpe bakento, mpe beno kwenda na ntuala. Ata mpe na kati ya ba-parc, ba ke sala mambu ya kuvukisa banzutu kuna na kati ya parc, na pwelele, ba ke sala keba ve; Angleterre, mpe, bayankaka nionso. Beno me mona? Yina ke yimbi ve kulutula yina kele awa. Kaka kima mutindu mosi awa, kaka fioti diaka yimbi; beno fika yawu fioti mingi diaka awa, na lweka ya pulusu mpe nionso. Ntangu yayi, kasi kaka ya boma!

<sup>233</sup> Mbote, ntwenya yayi ya bakala, yandi vwanda bikana yandi mosi na nyonso ya yawu. Ntangu ba ke kwendaka na bafeti ya bawu, yandi ke bika bawu kukwenda, kasi yandi vwandaka longuka kuvwanda artiste. Na yina, kilumbu mosi mukengi mosi ya kiboba, yina vwandaka Muklisto yina vwandaka pene-pene ya musée, kivinga ya biteki, yandi tubaka—yandi tubaka, “Beto tambula fioti, mwana. Beto tambula, mu zola tuba na nge na mwa ntangu fioti.”

Yandi tubaka, “Mbote mingi.”

<sup>234</sup> Na yina bawu kwendaka, mpe vwandaka mata mongo, mpe bawu zole vwandaka na maboko ya bawu na manima ya bawu, bawu vwandaka mata mongo. Mwini vwandaka kota. Mpe kuna kiboba ya bakala vwandaka tuba na ntwenya, yandi tubaka, “Mwana, nge kele muntu ya Amerika.”

Yandi tubaka, “Ya kele mutindu yina.”

<sup>235</sup> Yandi tubaka, “Beni kwisaka awa samu na kulonguka art. Mu banza ti nge ke zola vwanda artiste na luzingu ya nge.”

Yandi tubaka, “Mu ke zola kusala yawu, tata.”

Yandi tubaka, “Mu ke mona ti nge kele Muklisto.”

Yandi tubaka, “Mu kele Muklisto.”

<sup>236</sup> Yandi tubaka, “Mbote, mu zola yufula nge kima mosi. Mu me yufula bantu yankaka yayi. Bawu me tuba ti bawu kele Baklisto, mpe.” Yandi tubaka, “Yinki ke salaka ti nge vwanda ya kuswaswana? Yinki ke sala nge ya kuswaswana na bana-babakala yayi nionso me katuka na Amerique, mpe bana-bakento yayi me katuka na Amerique? Yinki ke sala nge ya kuswaswana mingi, mpe kasi beno nionso ke tuba ti beno kele ‘Baklisto?’”

Yandi tubaka, “Tata, nge ke mona mutindu mwini ke lalaka?”

Yandi tubaka, “Mu ke mona yawu.”

<sup>237</sup> Yandi tubaka, “Kuna na simu ya nzadi, na yinsi mosi kuna na New England, na mbanza mosi na yinsi yina, mpe na kati ya yinzo mosi na kati ya mbanza yina, kele mwana-kento mosi yina mu silaka ti mu ke zinga ya kukwikama na yandi.” Yandi tubaka, “Yawu yina kaka kele na dibanza ya munu, kubaka malongi ya munu na art mpe kuvutuka na mwana-kento yina ke zinga ya kukwikama na munu.” Yandi tubaka, “Ya kele mutindu yina mu ke zingaka mutindu mu ke salaka.”

<sup>238</sup> Oh, mpangi-bakala, mpangi-kento, beno lenda kukiyufula samu na yinki beto ke kipe ve yina ba ke bokilaka beto. Mu ke kipe ve yina ba ke tuba.

<sup>239</sup> Mu vwandaka ya kutelama na Fred kilumbu yankaka yina, kuna na San Juan, na Porto Rico, mu vwanda tala na simu ya mubu, mpe monaka kuna, kinkuku yina ya matadi ya kutandama, na kati-kati ya kilometre kuna, bitembo yayi ya nene ke yalumuka. Yandi tubaka. . .Bandeke yayi Flamingo vwandaka tambula na kati ya disamba, mpe nionso yina. Mu tubaka. . . Yandi tubaka, “Mpangi Branham, yayi ke mutindu Mazulu.”

<sup>240</sup> Mu tubaka, “Kasi nzadi ke vwanda swi kuna, mpangi-bakala.” Mu tubaka, “Kuna na simu ya nzadi, ya kele na kisika yina ba ke bokilaka Mazulu, ya ke na Mosi yina ba ke bokila Yesu, na Mazulu yayi, kilumbu yina Yandi katulaka masumu ya munu nionso. Mpe mu silaka Yandi ti mu ke vwanda ya kukwikama na Yandi, mu ke sala bima yina Yandi ke zolaka munu kusala. Kikuma yawu yina mu ke na nsoni ve ya Nsangu ya mbote ya Yandi, Yawu kele Ngolo ya Nzambi samu na mpulusu.” Ya kele yina ke salaka Muklisto kuzinga mutindu yankaka. Yandi kele ya kuswaswana samu ti yandi ke na Kima mosi samu na kuzinga ya kuswaswana.

Beto kulumusa bayintu ya beto na mwa ntangu fioti.

<sup>241</sup> Nkundi ya munu ya kulemba, na suka yayi, nge ke na kima ya luswaswanu samu na kuzinga na yawu, kima yina ke basisa nge na yinza, kima yina zola tuba mingi samu na nge kulutilla

yinza ya muvimba, kele kuzinga samu na Klisto? Kana beno me kuzwa yawu ve, samu na yinki beno ke yamba Yawu ve ntangu yayi. Beno kwenda kaka ve na dibuundu mpe beno tuba, “Mu zola kuvwanda muntu ya mbote.” Beno sala yawu ve. Beno zola kuvwanda Muklisto. Beno, kana ya kele na kima ntangu nyonso yina ke vwandaka na kati ya ntima ya beno, ke tuba na beno, “Beno kele ve ya kusungama, kasi mu zola ti beno kuvwanda ya kusungama.” Beno ke vwandaka ntangu nionso na nsatu ya kuvwanda kima mosi yina beno kele ve na ntangu yayi, beno zaba ve ti ya kele Nzambi yina ke bokila beno? Beno balula ve mukongo ya beno na yawu. “Samu ti kana beno vwandaka mbala mosi ya kutemuka mpe kuzwaka ntangu ya mbote, mpe me manga yawu mbala ya beno ya nsuka, ya kele dyaka ve na munkayulu yina lenda kukatula disumu.” Beno vukana ve na Ésäü.

<sup>242</sup> Beno kwisa na Jacob, kukondwa kutala . . . kukondwa kutala yina ya ke lomba beno. Kana yawu ke lomba yinzo ya beno, kana yawu ke lomba kosalu ya beno, kana yawu ke lomba bakala ya beno, yawu ke lomba kento ya beno, kana ya ke lomba bana ya beno, kana ya ke lomba konso kima, beno kuzwa bukuluntu! Yawu yina kele mfunu. Mpe kana beno ke kuwa mutindu yina samu na yawu, na suka yayi, mpe mu zola kuzwa bukuluntu yayi! Mu lenda ve kupesa Yawu na beno. Nzambi lenda, mpe Yandi kele Yandi yina ke na kuzonzaka na beno. Beno zola kaka kutelemisa diboko ya beno, kutuba, “Sambila samu na munu, Mpangi Branham. Bukuluntu yina, mu ke zola.” Nzambi sakumuna beno, bisika nyonso. “Bukuluntu yango, mu zola.”

<sup>243</sup> Tata ya beto ya Mazulu, mu ke tonda Nge, Nzambi ya Kulutila Lukumu mpe Nzambi ya Santu, samu na mambote ya Nge mpe mawa samu na bana-babakala mpe bana-bakento ya bantu. Mpe beto ke mona ti beto me kuma na ntangu ya nsuka, kima mosi ve lenda zinga diaka mingi. Beto ke vingila na ntangu ya kudefa; mutindu ya vwandaka na bilumbu ya Noé, mvibudulu ya Nzambi, ntangu ba vwandaka tunga nzaza, ntangu mioyo nana kuzwaka mpulusu. Nge tubaka, “Ya ke vwanda mutindu yina na nkwizulu ya Mwana ya muntu. Nzambi kele na mvibudulu, zola ve ti muntu kufwa, kasi ti bantu nyonso lendaka kwiza na kubalula ntima.”

<sup>244</sup> Mpe bubu yayi na kati ya kivinga yayi, ya kele na babakala mpe bakento me telemisa maboko ya bawu, bana-babakala mpe bana-bakento, bantwenia mpe biboba, me telemisa maboko ya bawu, mpe me tuba, “Kima mosi ke yangisa munu.” O Nzambi, bika ti bawu manga Yawu ata fioti ve. Bika ti bawu teka mayele ya bawu, bika ti bawu teka bima nionso yina ba ke na yawu. Mutindu bakala yina kuzwaka diyaka ya nene; ya vwandaka diyaka ya mfunu, ya nene, ya vwandaka diyaka ya kulutila nene, mpe yandi tekaka nionso ya yandi ya fioti, ti yandi fwana sumba diyaka yayi ya mfunu, ya nene. Bika bawu teka bima nionso



yina bawu me kuzwa na yinza, na suka yayi, kuzabana ya bawu nionso ya yinza.

<sup>245</sup> Bakento yayi me vwanda awa, Mfumu, mingi ya bayina me kuwaka Nsangu ya mbote kulongama bambala mingi, mpe kele kaka na kati ya mambu ya yinza, mpe ke sala mutindu yinza mpe ke lwata mutindu yinza, mpe ke kwendaka na bafeti mpe bima ya yinza, ke vukana na mambu ya yinza mpe ke sala mutindu yinza, mpe ke sadila bima ya yinza. O Nzambi, bika bawu vwanda na nsoni, na suka yayi. Kana ya kele ata na kivuvu ve na kati ya bawu, Mfumu, vutula yawu bubu yayi. Bika ti yayi kuvwanda ngunga.

<sup>246</sup> Mpe bantu yayi awa, Mfumu, O Nzambi, wila bawu mawa. Mingi na kati ya bawu ke tambula kaka na bima ya yinza, ke na nsatu mpe ke sepela na bima ya yinza, disumu, kunwa makaya, kunwa malafu, mwa malafu ya kinkundi, mwa bierre na lweka mosi, to—to kima ya mutindu yina, to ke lula, mpe ke namika mwa bakento ya bantwenia ya kitoko, yina me lwata bilele ya yimbi. Mpe na banzutu yina ba ke na kumona bawu na bala-bala, mpe ke luta kaka na ntwala ya bantu samu na kutala bawu, ba ke kukibokila bawu mosi Baklisto.

Mpe zaba ti mutindu ya nzutu yina ya kento, mu banza na bangunga makumi zole na yiya, ke vwanda ya kupola kuna na ntoni, baniama mpe misobi ke tambula na kati ya nzutu mpe misisa ya nzutu ya yandi; mpe moyo ya yandi ke vwanda kuna na difelo ya dyabulu, samu ti mutindu yandi vwandaka zinga. Mpe, kasi, yandi ke telemisa mwa bikoba ya yandi, ya kupakula, mpe ke sawula mpe ke seka beno.

<sup>247</sup> Nzambi, vwanda na kyadi na bantu yina. O Mfumu, kubika ve ti bawu kuzimbana. Vwanda na kiadi mpe fidisa kyadi. Pesa mosi na mosi ya bawu, Mfumu. Nge kele Yandi yina kaka lenda pesa lusakumunu yayi. Mpe kana Nge me bokila bawu na Luzingu ya Kukonda nsuka, bika bantima ya bawu kuzibuka; mpe bawu ke tula nionso na lweka na suka yayi, mpe bawu ke kuzwa yawu. Pesa yawu, Tata.

<sup>248</sup> Mpe ntangu yayi bika ti Mpeve-Santu kukwisa na lukutakanu yayi, samu na bambevo mpe bantu ya mpasi, mpe bantu kumona ti Nsangu yayi me longama na suka yayi, ti Nkwizulu mpe bima nionso kele na nsuka, mpe Yesu ke sala na kati ya Dibuundu ya Yandi. Bika yawu salama kaka na ntangu yayi, Mfumu, ti Nge lenda baka bantu yayi na maboko ya Nge. Mpe ntangu bawu ke mona Mpeve-Santu ke sala, ke tambula na kati ya bantu, bika ti yawu siamisama, Nsangu yina mu me longa, ti beto me kuma na ntangu ya nsuka. Mpe bika bawu kuwa. Bawu me kuwa, mpe bika bawu ndima ti Yesu mosi yina, mutindu Yandi salaka yawu na kilumbu ya Yandi, Yandi kele awa na kusalaka yawu na nzila ya Dibuundu ya Yandi na kilumbu ya nsuka. Mpe na yina bika bawu sala, na

kupesaka baluzingu ya bawu mpe banzutu ya bawu, mpe mioyo mpe bampeve, na Yandi. Mu ke pesa bawu na Nge, Mfumu, na Nkumbu ya Yesu.

<sup>249</sup> Ntangu yayi, na kati ya kivinga kisika bantu kele, Mu me tinda Billy na suka yayi samu na kukabula bakalati ya bisambu. Yandi . . . [Kisika ya mpamba na bande—Mu.]

<sup>250</sup> Nge kele mbevo, kele na nsatu? Kana Nzambi lenda talisa na munu, mutindu Yandi salaka na kento yina na dibulu ya masa, mpe ke tuba na munu yina kele mpasi ya nge, to kima mosi na zulu ya nge, yina nge zaba ti mu zaba ve, ya ke sala ti nge vwanda na lukwikilu ya kukwikila Nzambi? Yawu lenda sala ti bayankaka na kati ya beno kuzwa lukwikilu? Yayi ke ntangu ya beto ya ntete ya kukutana? [Mpangi-kento me tuba, “Ve.”—Mu.] Oh, nge me monaka munu ntete, kasi mu ke nzenza samu na nge. Ya kieleka? Mbote mingi, bika Mfumu Nzambi kupesa lombilu ya nge.

<sup>251</sup> Ntangu yayi, ya kele kieleka, to ve? Oh, la la! Beno bokila nsambulu ya beno ya lukolo. “Balaam,” yandi tubaka, “wapi kisika yandi kele?” Elie na Mongo Carmel, tubaka, “Wapi kisika kele Baalam? Wapi kisika? Beno vumbula yandi.” Beno fwana vumbula Yesu ve. Yandi kele ya kuvumbuka ntangu nionso. Yandi kele ntangu nyonso awa, ke na kuzinga, ke na lenda; mutindu mosi mazono, bubu yayi, mpe kukonda nsuka. Amen. Nzambi kele kaka Nzambi.

<sup>252</sup> Nge ke kwikila ti mpasi ya nge ya ntima ke bika nge mpe nge ke beluka? Nge kele ya awa ve. Nge vutuka na Lexington mpe nge tuba na bantu bima ya nene Mfumu me sala samu na nge. Beno me mona?

<sup>253</sup> Ya ke mata na zulu ya bayintu ya bantu, yina ke simba yawu ata fioti ve. Dibuundu ya moyo lendaka simba yawu, na nswalu, mpe kuzaba ti Mvwandulu ya Mpeve-Santu kele awa.

<sup>254</sup> Muntu mosi kuna na manima telemisaka diboko ya yandi. Nge, mama? Nge ke kwikila ti Nzambi lenda tuba na munu mpasi ya nge? Kiboba . . .

<sup>255</sup> Mpangi-bakala yina kele kuna na nsuka, mu ke kwikila yandi tubaka, ntama mingi ve, mutindu yina. Nge ke kwikila, mpangi-bakala? [Mpangi-bakala me tuba, “Yinga.”—Mu.] Nge ke kwikila? Na yina mpasi yina ya mpusu ke yambula nge, nge ke beluka. Nge ke kwikila yawu? Nge ke ndima yawu ti nge me beluka? Telemisa diboko ya nge, kana nge ke kwikila. Beno me mona? Uh-huh. Mbote mingi. Yandi kele nzenza samu na munu. Nge zaba yawu, Pat.

<sup>256</sup> Mama mosi talaka kuna, yandi vwandaka sambila, yandi tubaka ti yandi vwandaka nzenza. Nge ke kwikila ti hypertension ke yambula nge? Ya kieleka, mutindu yina ve? Telemisa diboko ya nge kana ya kieleka. Mbote mingi, vwanda na lukwikilu na Nzambi.

Beno me mona yina mu zola kutuba?

257 Wapi mutindu samu na bayankaka na kati ya beno yina zaba munu? Beno kele na kima na ntima ya beno. Beno telemisa diboko ya beno. Mingi na kati ya beno! Mu lenda sala yawu ve; Ya fwana kwisa kaka. Beno zaba, ya kele lukwikilu ya beno.

258 Georgie Bruce, mu ke mona yandi ya kuvwanda kuna. Nge ke meka ntangu nionso na kuzwa kima mosi samu na muntu mosi, Georgie. Nge belukaka, na cancer. Kuvwanda na kyuvu ve na yintu ya nge. Kilumbu yina nge kwizaka na tabernacle yayi mpe nge kotaka na kielo yina kuna, Mpeve-Santu me kwiza na zulu ya munu, mpe tubaka na nge ti nge salaka mambu yina muntu mosi ve na yinza zabaka kasi nge na Nzambi mpe muntu yankaka. Ya kele kieleka? Ya kele kieleka. Nge ke kwikila munu, mutindu yina ve, Georgie? Nge ke na kima mosi na ntima ya nge, Georgie. Nge ke kwikila ti Nzambi lenda tuba na munu yina ke na ntima ya nge?

Yina lenda sala ti bayankaka na kati ya beno, bantu yina zaba munu, ke kwikila?

259 Mu zaba Georgie, kasi yandi ke na kubanza na kima mosi. Yandi kele na bantu zole, yina kele ntama na kisika yayi awa, yandi ke na kusambila. Bawu nionso zole ke zingaka na Corydon. Ya kele kieleka. Mpe yandi kele na muntu mosi awa, bakala mosi yandi ke sambila, yandi kele awa na lupitalu. Mpe nge ke sambila, mingi ve samu na kubeluka ya yandi, kasi mpulusu ya moyo ya yandi. Ya kele MUTINDU ME TUBA MFUMU. Ya kieleka. Ya kieleka, Georgie? Ya kieleka.

260 Muntu mosi kuna na manima me telemisa diboko ya yandi, kuna na manima, na manima awa. Nge, yinki diambu ya nge? Nge lenda telemisa diboko ya nge, nge ke nzenza samu na munu? Bakala yayi me vwanda awa ke tala munu, mu zaba nge ve. Nge ke kwikila ti mu kele profete ya Nzambi, kisadi ya Nzambi? Nge ke kwikila ti Mpeve-Santu, yina mu me tuba kele Kieleka? Nge ke kwikila Yawu? [Mpangi-bakala me tuba, “Yinga.”—Mu.] Kana nge ke kwikila, nge ke ka- . . . yawu yina kaka nge ke na yawu, samu nge ke na kimbevo ya cancer. Ya kele kieleka. Nge kele ve ya mbanza yayi. Nge kele ya New Albany. Ya kele kieleka. Mpe nge kele na cancer. Kana nge ke kwikila na ntima ya nge ya muvimba, nge ke beluka. Nge ke ndima yawu? Telemisa diboko ya nge. Mfumu kusakumuka.

261 Mu banza, kento yina kuna na yimpu ya mpembe na yintu ya yandi, mama ya ndombe, yandi telemisaka diboko ya yandi. Mu me kuzwa ntete ve muntu ya ndombe. Nge ke kwikila, mama? Mbote mingi, tata, kwikila na ntima ya nge ya muvimba. Nge ke na mpasi ya ntima, mpasi na estomac, poto-poto. Muntu mosi me nata nge awa na suka yayi. MUTINDU ME TUBA MFUMU. Ya kieleka, mutindu yina ve, mama? Kana ya kieleka, pepa muswale

yina nge ke na yawu na diboko ya nge, na yina bantu ke mona. Mu me monaka ntete ve kento yayi na lusingu ya munu.

<sup>262</sup> Nge telemisaka diboko ya nge? Mu ke nzenza samu na nge? Mpe nge ke nzenza samu na munu. Nge ke kwikila ti Nzambi zaba munu, to Nzambi zaba nge? Nge ke kwikila ti Yandi lenda tuba na munu yina ke na ntima ya nge? Nge ke sambila samu na muntu mosi. Yawu ke tata ya nge, yina ke na mpasi ya ntima. Ya kele kieleka. Mpe nge ke na kusosaka mbotika ya Mpeve-Santu. MUTINDU ME TUBA MFUMU.

Kana nge lenda kwikila!

<sup>263</sup> Yinki diambu samu na mwa mama yayi na diboko na zulu mutindu *yayi*, nge ke kwikila? Mpasi ya nge kele kuvimba yina na diboko ya nge. Kasi nge ke na kusambilaka samu na mutekolo. Ya kele kieleka. Mwana kele mbote ve. Ya kieleka. Mutindu yina ve, mama? Nge ke kwikila na ntima ya nge ya muvimba, samu na yawu.

Ntangu mu tubaka, “mwana.” Vingila fioti. Oh, yawu yina. Mwana ya nge ya bakala kuzwaka kisumbula ya tomabilu; yandi me kuma kikata. Mu zaba nge ve, mama, kasi ya kieleka. Kana ya kieleka, telemisa diboko ya nge.

<sup>264</sup> Ntangu yayi, Nani kele awa? Nani Yawu kele? Ya kele munu ve. Wapi mutindu mu lenda sala yawu? Beno kondwa ve Mpeve, bima ya Kimpeve. Ya kele Nzambi awa! Mpeve-Santu yina beno zola, beno ke kwikila Yawu ntangu yayi? Beno ke kwikila Yawu ntangu yayi? Mbote mingi, na manima kuzwa Yawu ntangu yayi. Ntangu yayi kele ntangu ya kuzwa Yawu. Beno kwikila na ntima ya beno ya muvimba.

<sup>265</sup> Beno yina kele bambevo to na nsatu. Mu lenda belula ve. Muntu mosi ve lenda belula. Mu lenda pesa Mpeve-Santu ve. Kasi Yandi yina lenda belula mpe kupesa Mpeve-Santu, Yandi kele awa. Yandi kele Yandi Yina ke salaka yawu.

<sup>266</sup> Ntangu yayi beno kulumusa bayintu ya beno. Beno kwikila na ntangu yayi, mutindu mu ke sambila samu na beno mpe bamuswale yayi.

<sup>267</sup> Tata ya beto ya Mazulu, na mutindu mu zaba, mu me luta bantu yina nionso vwandaka banzenza, mutindu munu mosi me kuwa kulemba mpe kukondwa ngolo; mu me twadisama ti yayi kele ntangu mu banza ti Musolami me mona. Bika ti mosi na mosi ya bawu, Mfumu, yina ba me bokila mpe ba me pesa muswa ba bokila bawu na Mpeve ya Nge; kima mosi, lukwikilu ya bawu, bawu vwandaka na lukwikilu mingi (bayankaka kati ya bawu) kulutula mutindu bawu banzaka. Bawu bandaka kaka na kati ya bantima ya bawu.

<sup>268</sup> Mpe kento yina simbaka lele ya Yandi na ntangu Yandi lutaka, mpe Yandi balukaka mpe tubaka, “Nani me simba Munu?”

Mpe bawu tubaka, “Mbote, bantu nionso me simba Nge.”

<sup>269</sup> Yandi tubaka, “Kasi mu me mona ti mu me lembe.” Mpe Yandi monaka mwa kento yango mpe tubaka na yandi ti yandi vwandaka basika menga, mpe lukwikilu ya yandi belukaka yandi.

<sup>270</sup> Mpe Biblia ke tuba, ti, “Yandi kele dyaka Nganga-Nzambi ya Mbuta, bubu yayi, yina lenda simbama na bansatu ya bimbevo ya beto.” Masonuku me tuba, “Yandi kele mutindu mosi mazono, bubu yayi, mpe kukonda nsuka.” Mpe kana Yandi kele mutindu mosi, mpe Nganga-Nzambi mosi ya Mbuta, Yandi ke sala mambu mutindu mosi mpe ke sala bima ya mutindu mosi.

<sup>271</sup> Mpe bika ti bantu kumona ti Dibuundu ya kufuluka na Mpeve ke kwisa na yintu. Klisto ke zola kwisa mpe kubaka Dibuundu ya Yandi. Bidimbu ya Yandi ya nsuka, mutindu ya vwandaka na bilumbu ya Sodome; Nani zonzaka, zabaka Sarah, mpe zabaka ti yandi vwandaka na kento na nkumbu ya Sarah, zabaka ti yandi sekaka kuna na kati ya tenta; Yandi tubaka, “Yina ke vwanda kidimbu. Ntangu beno ke mona yawu, beno bambuka moyo, nsungi yina ke luta ve tii kuna nionso ke salama.” Yawu yayi. Beto me kuma na nsuka.

<sup>272</sup> Pesa, Mfumu, ti konso mbevo na kati awa lenda zaba ti Yesu Klisto ya moyo kele awa. Bika ti bamuswale yayi kuvwanda ya kusakumuka na konso nzutu yina yawu ke kwenda. Mu ke bwisa diabulu, samu na bantu. Mu ke basisa yandi, na nzila ya Mpeve ya Nzambi, na lukwikilu, mu ke basisa konso kivudi ya ntembe. Bika muntu nyonso awa, yina kele ya kutumama na Luzingu ya Kukonda nsuka, kuzwa Yawu na ngunga yayi. Bika ti bindimandima nionso, mwa bansobolo nionso ya nzutu, mwa bima nionso ya yinza, mwa bizutu nionso, mutindu Biblia ke tuba, “Beto losa konso kizitu, mpe disumu ke kangaka beto kukondwa mpasi; ti beto lenda kima mbangu, na mvibudulu, dikanda yina kele na ntwala ya beto; kutala” (na yinki? na dibuundu? na organisation?) “na Mubandisi mpe Nsuka ya lukwikilu ya beto,” yina kele awa ntangu yayi, “Yesu Klisto, Mwana ya Nzambi.” Beto ke tala na Yandi Yina . . . Beto fwana baka bampova ve yina beto zaba ti ya kele kieleka, kasi na yina Bandinga me kuma ya kieleka samu na beto na suka yayi. Yesu mosi yina kufwaka, kele ya kufwa ve, Yandi me vumbuka dyaka, mpe bamvula mafunda zole na ntwala Yandi ke nata Dibuundu ya Yandi na yintu. Mpeve ya Judas ke sala na kati ya bawu. Kasi bika ti bawu tula na lweka konso ditadi ya disakuba mpe nionso yina, na ngunga yayi, mpe bawu yamba Yandi.

<sup>273</sup> Bika bawu kuwa, yina bawu me kuzwa, na nzila ya dilongi. Bika bawu kundima ntangu yayi ti Bandinga ya kieleka yina bawu kuwaka me monisama, mpe bawu ke ndima Yawu, ti Yawu kele Klisto. Mpe bika ntangu yayi bawu sala, bawu sala na nzila ya Yawu: bawu ndima Yawu, mpe bawu telama, bawu

pesa kimbangi; mpe kukota na Kimfumu ya Nzambi, na nzila ya kuvwanda ya kufuluka na Mpeve-Santu.

<sup>274</sup> Bika ti bambevo kubeluka. Bika ti bantu ya mpasi kubeluka. Bika ti konso nsatu ya ntima kukuma ya kusungama. Pesa yawu, Nzambi ya Ngolo nionso.

<sup>275</sup> Ntangu yayi na bayintu ya beto ya kukulumusa, bantima ya beno kele ya kuzibuka, beno kukipesa kaka beno mosi na ntangu ya bisambu; kaka ntete, mu banza, ksalu ya mbotika ke kwisa, kaka na ntwala ya yayi. Ya ke vwanda na ksalu yankaka na nkokila yayi.

<sup>276</sup> Ntangu yayi, beno bambuka moyo, beno bika ve ntangu ya mbote yayi kuluta. Mu me vwanda awa ntangu yayi bangunga zole na ndambu, to kulutila, mu vwanda meka kaka na kubaka ntangu ya munu, mpe kulunga Nsangu ya mbote, mpe me longa Yawu na mutindu ya kulunga. Na manima beto me kuma na nsuka. Mpe masonuku ya kieleka: beno kuwa, beno ndima, beno sadila. Beno bika yawu luta ve na zulu ya yintu ya beno. Beno me kuwa Yawu. Beno me ndima ti Mvwandulu ya Yandi kele awa? Beno zaba ti Ya kele Yandi yina ke na kubokila beno? Na yina beno sala na nzila ya Yawu. Nzambi kuvwanda na beno. Beno kuzwa ntangu ya bisambu.

<sup>277</sup> Mpangi Neville, nge ke kwisa, fioti, samu na kisambu, kana nge zola kwisa awa.

Beno telemisa yandi.



*KUWA, KUNDIMA, KUSALA NA NZILA YA NDINGA YA NZAMBI* KNG60-0221  
(Hearing, Recognizing, Acting On The Word Of God)

Nsangu yayi ya Mpangi William Marrion Branham, kulongamaka na Kingelesi, na Lumingu na suka, na kilumbu ya 21 ya Ngonda ya zole, na mvula 1960, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2022 VGR, ALL RIGHTS RESERVED

**VOICE OF GOD RECORDINGS**  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)